

漢魏六朝百三家集

隋

隋煬帝

第九十七冊

EAST ASIAN LIBRARY  
RM 8049 ROBARTS LIBRARY  
UNIVERSITY OF TORONTO  
TORONTO, CANADA M5S 1A5

V. 97-100







御製集



隋煬帝集

PL  
2494  
H38  
1379  
v.92160



隋煬帝集題詞

隋煬帝志慕秦皇漢武而內行則劉  
聰石虎雖有文不善也逃樓鳳船歌  
聲兆亡其亦漢成時燕燕諸謠乎隋  
書文苑傳稱帝意在驕淫詞無浮蕩  
綴文之士得依取正余疑其諛比觀



全集多莊言簡戲謔似史評非誣也  
帝在藩時謀奪儲位朽絃老婢矯飾  
悅親文辭矜束尚其餘智及突厥旣  
來江都往幸飛帛戲題持檝成咏則  
楠木心蕩沙邱命盡之日矣帝朝京  
師還作歸藩賦命柳詒序之今集無



有知傳者多缺他文自詔書外雅深  
佞佛毘曇學聖黎耶悟真自謂顏淵  
值宣尼尹喜逢老氏也身受法戒而  
烝弑無慚開士之談豈足信哉陳隋  
文哀帝王有作與衆同波抑煬帝云  
多彈曲者如人多讀書讀書多則能



撰書彈曲多卽能造曲以論文學殆  
庶乎而王叔亦與衆同歟

婁東張溥題



隋煬帝集目錄

詔

營東京詔

立七廟詔

脩高廟樂詔

爲先代立後詔

爲孔子立後詔

爲前代帝王守陵墓詔

爲昔賢立祠詔



功臣襲封詔

勲官不得回授職事詔

舉賢詔

勵經術詔

巡省風俗詔

尚齒詔

緝民詔

教義詔

安集詔



恤行役詔

達幽枉詔

寬連坐詔

改博陵爲高陽郡詔

埋祭死亡軍士詔

親征高麗詔

再伐高麗詔

勞楊素手詔

爲楊素立碑詔



手詔史祥

褒樊子蓋詔

詔樊子蓋

又

加蘇威開府儀同三司詔

以衛玄爲光祿大夫詔

贈劉方上柱國盧國公詔

贈豆盧毓大將軍詔

改封豆盧毓雍邱侯詔



追贈獨孤陁詔

又

責蘇威詔

徙衛王集滕王綸詔

優突厥詔

答議突厥改服詔

賜啓民位侯王上詔

與高昌國王詔

勅



答齊王勅

與柳謩之勅

勅度四十九人法名

行道度人天下勅

璽書

降來護兒璽書

答突厥啓民璽書

檄

遺陳尚書江總檄



令

與天台山衆令

重令

書

遺史祥書

遺延智顓書

治禪衆寺答智顓書

法諱奉智者書

叅智者書



請留智者書

重留智者書

許智者行書

謝法門書

遣使往匡山叅書

重遣匡山叅書

答智顗述匡山寺書

與匡山三寺書

與峯頂寺書



與禪閣寺書

入朝遣使叅書

又

又

又

又

又

遣使荊州迎書

遣使潭州迎書



在京遣書

在京重遣書

從駕東岱於路遣書

於路次書

還藩遣迎書

謝天冠并請淨名義書

重與智者請義書

謝義疏書

論荊州諸寺書



重答智者書

與荊州總管達奚儒書

迎智者入城礙雨移日書

次迎入城書

答智顗蔣州事書

遣使入天台叅書

遣使入天台迎書

遣使叅病書

答智顗遺旨書

智顗終後弔山衆書

遣使入天台設周忌書

賜釋慧覺書

請釋灌頂書

召徐則書

徐則沒後下書

文

寶臺經藏願文

誄



秦孝王誄

疏

受菩薩戒疏

天台建功德發願疏

敬靈龕疏

設齋願疏

樂府

飲馬長城窟行示從征群臣

白馬篇

步虛詞二首

春江花月夜二首

錦石擣流黃二首

喜春遊歌二首

江都宮樂歌

泛龍舟

四時白紵歌二首

東宮春

江都夏



紀遼東二首

詩

冬至乾陽殿受朝

雪中受突厥主朝宴席賦

宴東堂

賜史祥

賜牛弘

賜諸葛穎

早渡淮

臨渭源

還京師

捨舟登陸示慧日道場玉清玄壇德衆

謁方山靈巖寺

月夜觀星

季秋觀海

望海

詠鷹

獻歲讌宮臣



正月十五日于通衢建燈夜升南樓

晚春

悲秋

冬夜

夏日臨江

北鄉古松樹

賜守宮女

持檄篇賜吳絳仙

贈張麗華

憶韓俊娥二首

幸江都作

嘲羅羅

鳳船歌

迷樓歌

效劉孝綽襍憶詩二首

附錄

本紀

隋煬帝目錄終



楊帝集卷全

明太倉張溥閱

詔

營東京詔

乾道變化、陰陽所以消息、沿創不同、生靈所以  
順叙、若使天意不變、施化何以成四時、人事不  
易、爲政何以釐萬姓、易不云乎、通其變、使民不  
倦、變則通通則久、有德則可久、有功則可大、朕

又聞之、安安而能遷、民用丕變、是故姬邑兩周。  
如武王之意。殷人五徙。成湯后之業。若不因人。  
順天、功業見乎變。愛人治國者、可不謂歟。然洛  
邑自古之都、王畿之內、天地之所合、陰陽之所  
和、控以三河、固以四塞、水陸通、貢賦等、故漢祖  
曰、吾行天下多矣、唯見洛陽、自古皇王、何嘗不  
畱意、所不都者、蓋有由焉、或以九州未一、或以  
困其府庫、作洛之制、所以未暇也、我有隋之始、  
便欲創茲懷雒、日復一日、越暨于今、念茲在茲、



興言感哽。朕肅膺寶曆、纂臨萬邦、遵而不失、心奉先志。今者漢王諒悖逆、毒被山東、遂使州縣或淪、非所。此由關河懸遠、兵不赴急、加以并州移居、復在河南。周遷殷人、意在於此。況復南服遐遠、東夏殷人、因機順動。今也其時。羣司百辟、僉諧厥議、但成周墟、弗堪葺宇。今可於伊洛營建東京、便卽設官分職、以爲民極也。夫宮室之制、本以便生、上棟下宇、足避風露、高臺廣廈、豈曰適形。故傳云儉德之共、侈惡之大。宣尼有

云與其不遜也甯儉豈謂瑤臺瓊室方爲宮殿者乎土堦采椽而非帝王者乎是知非天下以奉一人乃一人以主天下也民惟國本本固邦甯百姓足孰與不足今所營構務從節儉無令雕墻峻宇復起於當今欲使卑宮菲食將貽於後世有司明爲條格稱朕意焉

立七廟詔

聿追孝饗德莫至焉崇建寢廟禮之大者然則質文異代損益殊時學滅坑焚經典散逸憲章



湮墜、廟堂制度、師說不同、所以世數多少、莫能  
是正、連室異宮、亦無準定、朕獲奉祖宗、欽承景  
業、永惟嚴配、思隆大典、於是詢謀在位、博訪儒  
術、咸以爲高祖文皇帝受天明命、奄有區夏、拯  
羣飛於四海、革凋敝於百王、恤獄緩刑、生靈皆  
遂其性、輕徭薄賦、比屋各安其業、恢夷宇宙、混  
一車書、東漸西被、無思不服、南征北怨、俱荷來  
蘇、駕毳乘風、歷代所弗至、辮髮左衽、聲教所罕  
及、莫不厥角關塞、頓顙闕庭、譯靡絕時、書無虛

月、韜、戈、偃、武、天、下、晏、如、嘉、瑞、休、徵、表、裏、禔、福、猗、歟、偉、歟、無、得、而、名、者、也、朕、又、聞、之、德、厚、者、流、光、治、辨、者、禮、綴、是、以、周、之、文、武、漢、之、高、光、其、典、章、特、立、謚、號、斯、重、豈、非、緣、情、稱、術、卽、崇、顯、之、義、乎、高、祖、文、皇、帝、宜、別、建、廟、宇、以、彰、巍、巍、之、德、仍、遵、月、祭、用、表、蒸、蒸、之、懷、有、司、以、時、創、造、務、合、典、制、又、名、位、旣、殊、禮、亦、異、等、天、子、七、廟、事、著、前、經、諸、侯、二、昭、義、有、差、降、故、其、以、多、爲、貴、王、者、之、禮、今、可、依、用、貽、厥、後、昆、



脩高廟樂詔

古先哲王、經國成務、莫不因人心而制禮、則天  
明而作樂、昔漢氏諸廟別、所樂亦不同、至於光  
武之後、始立共堂之制、魏文承運、初營廟寢、太  
祖一室、獨爲別宮、自茲之後、兵車交爭、制作規  
模、日不暇給、伏惟高祖文皇帝功侔造物、道濟  
生靈、享薦宜殊、樂舞須別、今若月祭時饗、旣與  
諸祖共庭、至於舞功、獨於一室、交違禮意、未合  
人情、其詳議以聞、

爲先代立後詔

昔周王下車首封唐虞之胤漢帝承曆亦命殷周之後皆所以褒立先代憲章在昔朕嗣膺景業傍求雅訓有一弘益欽若令典以爲周兼夏殷文質大備漢有天下車書混一魏晉沿襲風流未遠竝宜立後以存繼絕之義有司可求其胄緒列聞

爲孔子立後詔

先師尼父聖德在躬誕發天縱之資憲章文武



之道。命世膺期。蘊茲素王。而頽山之歎。忽踰於千祀。盛德之美。不存於百代。永惟懿範。宜有優崇。可立孔子後爲紹聖侯。有司求其苗裔。錄以申上。

爲前代帝王守陵墓詔

前代帝王。因時創業。君民建國。禮尊南面。而厯運推移。年世永久。邱壟殘毀。樵牧相趨。塋兆堙蕪。封樹莫辨。興言淪滅。有愴於懷。自古已來。帝王陵墓。可給隨近十戶。蠲其雜役。以供守視。

爲昔賢立祠詔

旌表先君、式存饗祀、所以優禮賢能、顯彰遺愛、  
朕永鑒前脩、尙想名德、何嘗不興歎九原、屬懷  
千載、其自古已來、賢人君子、有能樹聲立德、佐  
世匡時、博利殊功、有益於人者、竝宜營立祠宇、  
以時致祭、墳壟之處、不得侵踐、有司量爲條式、  
稱朕意焉

功臣襲封詔

夫帝國草創、王業艱難、咸仗股肱、叶同心德、用



國祚厥頽運、克膺大寶、然後疇庸茂實、開國承  
誓以山河、傳之不朽、近代喪亂、四海未一、茅  
土妄假、名實相乖、歷茲永久、莫能懲革、皇運之  
初、百度伊始、猶循舊貫、未暇改作、今天下交泰、  
文軌攸同、宜率遵先典、永垂大訓、自今已後、唯  
有功勳、乃得賜封、仍令子孫承襲、

勳官不得回授職事詔

軍國異容、文武殊用、匡危拯難、則霸德攸興、化  
人成俗、則王道斯貴、時方撥亂、屠販可以登朝、

世屬隆平。經術然後升仕。豐都爰肇。儒服無預。于周行。建武之朝。功臣不參於吏職。自三方未。一四海交爭。不遑文教。唯尚武功。設官分職。罕。以才授。班朝治人。乃由勳叙。莫非拔足行陣。出自勇夫。敦學之道。旣所不習。政事之方。故亦無取。是非暗於在已。威福專於下吏。貪冒貨賄。不知紀極。蠹政害民。實由於此。自今已後。諸授勳官者。竝不得回授文武職事。庶遵彼更張。取類於調瑟。求諸名製。不傷於美錦。若吏部輒擬用。



者御史卽宜糾彈

舉賢詔

天下之重。非獨治所安。帝王之功。豈一士之略。  
自古明君哲后。立政經邦。何嘗不選賢與能。收  
採幽滯。周稱多士。漢號得人。常想前風。載懷欽  
伋。朕負辰風興。晷旒待旦。引領巖谷。寘以周行。  
冀與羣才共康庶績。而藁茅寂寞。投竿罕至。豈  
讓美韜采。未值良工。將介石在懷。確乎難拔。永  
鑒前哲。憮然興歎。凡厥在位。譬諸股肱。若濟巨

川義同舟楫。豈得保茲寵祿。晦爾所知。優游卒歲。甚非謂也。祈大夫之舉善。良史以爲至公。臧文仲之蔽賢。尼父譏其竊位。求諸往古。非無褒貶。宜思進善。用匡虛薄。夫孝弟有聞。人倫之本。德行敦厚。立身之要。或節義可稱。或操履清潔。所以激貪厲俗。有裨風化。強毅正直。執憲不撓。學業優敏。文才美秀。竝爲廊廟之用。實乃瑚璉之資。才堪將略。則拔之以禦侮。膂力驍壯。則任之以爪牙。爰及一藝可取。亦宜採錄。衆善畢舉。



與時無棄、以此求治、庶幾非遠、文武有職事者、五品已上、宜依令十科舉人、有一於此、不必求備、朕當待以不次、隨才升擢、其見任九品已上官者、不在舉送之限、

勵經術詔

君民建國、教學爲先、移風易俗、必自茲始、而言絕義垂、多厯年代、進德脩業、其道寢微、漢採坑焚之餘、不絕如線、晉承板蕩之運、掃地將盡、自時厥後、軍國多虞、雖復黷宇時建、示同愛禮、函

文或陳、殆爲虛器、遂使紆青拖紫、非以學優、製  
錦操刀、類多牆面、上陵下替、網維靡立、雅缺道  
消、實由於此、朕纂承洪緒、思弘大訓、將欲尊師  
重道、用闡厥繇、講信脩睦、敦獎名教、方今宇宙  
平一、文軌攸同、十步之內、必有芳草、四海之中、  
豈無奇秀、諸在家及見入學者、若有篤志好古、  
耽悅典墳、學行優敏、堪膺時務、所在採訪、具以  
名聞、卽當隨其器能、擢以不次、若研精經術、未  
願進仕者、可依其藝業深淺、門蔭高卑、雖未升



朝竝量準給祿庶夫恂恂善誘不日成器濟濟  
盈朝何遠之有其國子等學亦宜申明舊制教  
習生徒具爲課試之法以盡砥礪之道

### 巡省風俗詔

昔者哲王之治天下也其在愛民乎旣富而教  
家給人足故能風淳俗厚遠至邇安治定功成  
率由斯道朕嗣膺寶曆撫育黎獻夙夜戰兢若  
臨川谷雖則聿遵先緒弗敢失墜永言政術多  
有缺然況以四海之遠兆民之衆未獲親臨問

其疾苦每慮幽仄莫舉冤屈不申一物失所乃傷和氣萬方有罪責在朕躬所以寤寐增歎而夕惕載懷者也今既布政惟始宜存寬大可分遣使人巡省方俗宣揚風化薦拔幽滯申達幽枉孝悌力田給以優復鰥寡孤獨不能自存者量加賑濟義夫節婦旌表門閭高年之老加其版授竝依別條賜以粟帛篤疾之徒給侍丁者雖有侍養之名曾無調贍之實明加檢校使得存養若有名行顯著操履修潔及學業才能一



藝可取，咸宜訪採，將身入朝，所在州縣，以禮發遣，其有蠹政害人，不便於時者，使還之日，具錄奏聞。

### 尚齒詔

優德尚齒，載之典訓，尊事乞言，義彰膠序，嚮熊爲師，取非筋力，方叔元老，克壯其猷，朕永言稽古，用求至治，是以龐眉黃髮，更令收敘，務簡秩優，無虧藥膳，庶等臥治，佇其弘益，今歲耆老，赴集者，可於近郡處置，年七十以上，疾患沉滯，不

堪居職卽給賜帛送還本郡其官至七品已上者量給廩以終厥身

緝民詔

設險守國著自前經重門禦暴事彰往策所以宅土甯邦禁邪固本而近代戰爭居人散逸田疇無伍郭郭不脩遂使遊惰實繁寇攘未息今天下平一海內晏如宜令人悉城居田隨近給使強弱相容力役兼濟穿窬無所厝其姦宄崔蒲不得聚其逋逃有司具爲事條務令得所



教義詔

武有七德、先之以安民、政有六本、興之以教義、  
高麗高元虧失藩禮、將欲問罪遼左、恢宣勝略、  
雖懷伐國、仍事省方、今往涿郡、巡撫民俗、其河  
北諸郡、及山西山東年九十已上者、版授太守、  
八十者授縣令

安集詔

古者帝王觀風問俗、皆所以憂勤兆庶、安集遐  
荒、自蕃夷內附、未遑親撫、山東經亂、須加存卹、

今欲安集河北、巡省趙魏、所司依式、

恤行役詔

朕觀風燕裔、問罪遼濱、文武叶力、爪牙思奮、莫不執銳勤王、捨家從役、罕蓄倉廩之資、兼損播殖之務、朕所以夕惕愀然、慮其匱乏、雖復素飽之衆、情在忘私、悅使之人、宜從其厚、諸行從一品以下、飲飛募人以上、家口郡縣宜數存問、若有糧食乏少、皆宜賑給、或雖有田疇貧弱、不能自耕種、可於多丁富室、勸課相助、使夫居者有



歛積之豐、行役無顧後之慮、

達幽枉詔

聽採輿頌、謀及庶民、故能審政刑之得失、是知  
昧旦思治、欲使幽枉必達、彝倫有章、而牧宰任  
稱朝委、苟爲徼幸、以求考課、虛立殿最、不存治  
實、綱紀於是弗理、冤屈所以莫申、關河重阻、無  
由自達、朕故建立東京、躬親存問、今將巡歷淮  
海、觀省風俗、眷求讜言、徒繁詞翰、而鄉校之內、  
闕爾無聞、惟然夕惕、用忘興寢、其民下有知州

縣官人政治苛刻、侵害百姓、背公徇私、不便於民者、宜聽詣朝堂封奏、庶乎四聰以達、天下無冤、

寬連坐詔

罪不及嗣、既弘至孝之道、恩由義斷、以勸事君之節、故羊鮒從戮、彌見叔向之誠、季布立勲、無預丁公之禍、用能樹聲往代、貽範將來、朕虛已爲政、思遵舊典、推心待物、每從寬政、六位成象、美厥含弘、一青掩德、甚非謂也、諸犯罪被戮之



門朞已下親仍令合仕聽預宿衛近侍之官

### 改博陵爲高陽郡詔

博陵昔爲定州地居衝要先皇厯試所基王化  
斯遠故以道冠幽風義高姚邑朕巡撫氓庶爰  
屆茲邦瞻望郊廛緬懷敬止思所以宣播德澤  
覃被下人崇紀顯號式光令緒可改博陵爲高  
陽郡授境內死罪已下給復一年

### 埋祭死亡軍士詔

竭力王役致身戎事咸由徇義莫匪勤誠委命

草澤棄骸原野興言念之每懷愍惻往年出車  
問罪將屆遼濱廟算勝略具有進止而諒愾凶  
罔識成敗高頴復狠本無智謀臨三軍猶兒戲  
視人命如草芥不遵成規坐貽撓退遂令死亡  
者衆不及埋藏今宜遣使人分道收葬設祭於  
遼西郡立道場一所恩加泉壤庶彌窮魂之冤  
澤及枯骨用弘仁者之惠

親征高麗詔

天地大德降繁霜於秋令聖哲至仁著甲兵於



刑典故知造化之有肅殺義在無私帝王之用  
干戈蓋非獲已版泉丹浦莫匪龔行取亂覆昏  
咸由順動況乎甘野誓師夏開成大禹之業商  
郊問罪周發成文王之志永監前載屬當朕躬  
粵我有隋誕膺靈命兼三才而建極一六合而  
爲家提封所漸細柳盤桃之外聲教爰暨紫舌  
黃枝之域遠至邇安罔不和會功成治定於是  
乎在而高麗小醜迷昏不恭崇聚勃碣之間薦  
食遼獫之境雖復漢魏誅戮巢窟暫傾亂離多

阻種落還集萃川藪於往代播實繁以迄今瞻  
彼華壤翦爲夷類厯年永久惡稔旣盈天道禍  
淫亡徵已兆亂常敗德非可勝圖掩慝懷姦惟  
日不足移告之嚴未嘗面受朝覲之禮莫肯躬  
親誘納亡叛不知紀極充斥邊陲亟勞烽候關  
析以之不靜生人爲之廢業在昔薄伐已漏天  
網旣緩前禽之戮未卽後服之誅曾不懷恩翻  
爲長惡乃兼契丹之黨虔劉海戍習韃韞之服  
侵軼遼西又青邱之表咸脩職貢碧海之濱同



稟正朔、遂復奪攘琛寶、遏絕往來、虐及弗辜、誠而遇禍、輜軒奉使、爰暨海東、旌節所次、途經藩境、而擁塞道路、拒絕王人、無事君之心、豈爲臣之禮、此而可忍、孰不可容、且法令苛酷、賦歛煩重、強臣豪族、咸執國鈞、朋黨比周、以之成俗、賄貨如市、冤枉莫申、重以仍歲灾凶、比屋饑饉、兵戈不息、徭役無期、力竭轉輸、身填溝壑、百姓愁苦、爰誰適從、境內哀惶、不勝其弊、迴首面內、各懷性命之圖、黃髮稚齒、咸興酷毒之歎、省俗觀

風爰屈幽朔，弔人問罪，無俟再駕。於是親總六師，用申九伐，拯厥阨危，協從天意。殄茲逋穢，克嗣先謨。今宜授律啓行，分麾屈路，掩渤海而雷震，歷夫餘以電掃。比戈按甲，誓旅而後行。三令五申，必勝而後戰。左第一軍，可鏤方道；第二軍，可長岑道；第三軍，可海冥道；第四軍，可蓋馬道；第五軍，可建安道；第六軍，可南蘇道；第七軍，可遼東道；第八軍，可玄菟道；第九軍，可扶餘道；第十軍，可朝鮮道；第十一軍，可沃沮道；第十二軍，



可樂浪道、右第一軍可黏蟬道、第二軍可含資  
道、第三軍可渾彌道、第四軍可臨屯道、第五軍  
可候城道、第六軍可提奚道、第七軍可踏頓道、  
第八軍可肅慎道、第九軍可碣石道、第十軍可  
東曉道、第十一軍可帶方道、第十二軍可襄平  
道、凡此衆軍、先奉廟略、絡繹引途、總集平壤、莫  
非如豺如貔之勇、百戰百勝之雄、顧盼則山岳  
傾頽、叱吒則風雲騰鬱、心德攸同、爪牙斯在、朕  
躬馭元戎、爲其節度、涉遼而東、循海之右、解倒

懸於遐裔。問疾苦於遺黎。其外輕齋遊闕。隨機  
赴響。卷甲銜枚。出其不意。又滄海道軍。舟艦千  
里。高颿電逝。巨艦雲飛。橫斷沮江。逕造平壤。島  
嶼之望斯絕。坎井之路已窮。其餘被髮左衽之  
人。控弦待發。微盧彭濮之旅。不謀同辭。杖順臨  
逆。人百其勇。以此衆戰。勢等摧枯。然則王者之  
師。義存止殺。聖人之教。必也勝殘。天罰有罪。本  
在元惡。人之多僻。脇從罔治。若高元泥首轅門。  
自歸司寇。卽宜解縛焚襪。弘之以恩。其餘臣人。



歸朝奉順咸加慰撫各安生業隨才任用無隔  
夷夏營壘所次務在整肅芻蕘有禁秋毫勿犯  
布以恩宥喻以禍福若其同惡相濟抗拒官軍  
國有常刑俾無遺類明加曉示稱朕意焉

再伐高麗詔

黃帝五十二戰成湯二十七征方乃德施諸侯  
令行天下盧芳小盜漢祖尙且親征隗囂餘燼  
光武猶自登隴豈不欲除暴止戈勞而後逸者  
哉朕纂成寶業君臨天下日月所照風雨所沾

孰非我臣、獨隔聲教、蕞爾高麗、僻居荒表、鳴張  
狠噬、侮慢不恭、抄竊我邊陲、侵軼我城鎮、是以  
去歲出軍、問罪遼碣、殪長蛇於玄菟、戮封豕於  
襄平、扶餘衆軍、風馳電逝、追奔逐北、徑踰沮水、  
滄海舟楫、衝賊腹心、焚其城郭、汙其宮室、高元  
伏鑕泥首、送款軍門、尋請入朝、歸罪司寇、朕以  
許其改過、乃詔班師、而長惡不悛、宴安鴆毒、此  
而可忍、孰不可容、便可分命六師、百道俱進、朕  
當親執武節、臨御諸軍、秣馬亢都、觀兵遼水、順



天誅於海外、救窮民於倒懸、征伐以正之、明德  
以誅之、止除元惡、餘無所問、若有識存亡之分、  
悟安危之機、翻然北首、自求多福、必其同惡相  
濟、抗拒王師、若火燎原、刑茲無赦、有司便宜宣  
布、咸使聞知、

勞楊素手詔

我有隋之御天下也、于今二十有四年、雖復外  
夷侵叛、而內難不作、脩文偃武、四海晏然、朕以  
不天、銜恤在疚、號天叩地、無所逮及、朕本以藩

王、謬膺儲兩、復以庸虛、纂承洪業、天下者先皇  
之天下也、所以戰戰兢兢、弗敢失墜、況復神器  
之重、生民之大哉、賊諒包藏禍心、自幼而長、羊  
質獸心、假託名譽、不奉國諱、先圖叛逆、違君父  
之命、成莫大之罪、誑惑良善、委任奸回、稱兵內  
侮、毒流百姓、私假署置、擅用謀戮、小加大、少陵  
長、民怨神怒、衆叛親離、爲惡不同、同歸於亂、朕  
寡兄弟、猶未忍及言、是故開關門而待寇、戢干  
戈而不發、朕聞之天生蒸民、爲之置君、仰惟先



旨。每以子民爲念。朕豈得枕伏苫廬顛而不救也。大義滅親。春秋高義。周旦乃誅二叔。漢啓乃戮七藩。義在茲乎。事不獲已。是以授公戎律。問罪太原。且逆子賊臣。何代不有。豈意今者。近出家國。所歎荼毒。甫爾便及此事。由朕不能和兄弟。不能安蒼生。德澤未弘。兵戈先動。賊亂者止一人。塗炭者乃衆庶。非惟寅畏天威。亦乃孤負付囑。薄德厚恥。愧乎天下。公乃先朝功臣。勲庸克茂。至如皇基草創。百物惟便。始匹馬歸朝。誠

識兼至、汴部鄭州、風卷秋籜、荆南塞北、若火燎  
原、早建殊勳、夙著誠節、及獻替朝端、具瞻惟允、  
爰弼朕躬、以濟時難、昔周勃霍光、無以加也、賊  
乃竊據蒲州、關梁斷絕、公以少擊衆、指期平殄、  
高壁據險、抗拒官軍、公以深謀、出其不意、霧廓  
雲除、冰消瓦解、長驅北邁、直趣巢窟、晉陽之南、  
蟻徒數萬、諒不量力、欲猶舉斧、公以稜威外討、  
發憤於內、忘身殉義、親當矢石、兵刃斃交、魚潰  
鳥散、僵屍蔽野、積甲若山、諒遂守窮城、以拒鉄



鈔公董率驍勇、四面攻圍、使其欲戰不敢、求走  
無路、智力俱盡、面縛軍門、斬將搃旗、伐叛柔服、  
元惡旣除、東夏清晏、嘉庸茂績、於是乎在、昔武  
安平趙、淮陰定齊、豈若公遠而不勞、速而克捷  
者也、朕殷憂諒闇、不得親御六軍、未能問道於  
上庠、遂使劬勞於行陣、言念於此、無忘寢食、公  
乃建異世之元勳、執一心之確志、古人有言曰、  
疾風知勁草、世亂有誠臣、公得之矣、方乃銘之  
常鼎、豈止書勳竹帛哉、功績克諧、哽歎無已、稍

冷公如宜軍旅務殷殊當勞慮故遣公弟指宣  
往懷迷塞不次

爲楊素立碑詔

夫銘功彝器紀德豐碑所以垂名迹於不朽樹  
風聲於沒世故楚景武公素茂績元勳劬勞王  
室竭盡誠節叶贊朕躬故以道邁三傑功參十  
亂未臻遐毒遽戢清徽春秋遞代方綿歲祀式  
播雕篆用圖勳德可立碑宰隧以彰盛美

手詔史祥



昔歲勞公問罪河朔賊爾日塞兩關之路據倉阻河百姓脇從人亦衆矣公竭誠奮勇一舉剋定詩不云乎喪亂旣平旣安且甯非英才大畧其孰能與於此邪故聊示所懷亦何謝也

褒樊子蓋詔

子蓋爲武威太守以善政聞大業三年入朝帝引之內殿特蒙褒美乃下詔

設官之道必在用賢安人之術莫如善政龔汲振德化於前張杜垂清風於後共治天下實資良守子蓋幹局通敏操履清潔自剖符四服愛

惠爲先、撫道有友、寬猛得所、處腴膏不潤、其質  
酌貪泉、豈渝其性、故能治績克彰、課最之首、凡  
厥在位、莫匪王臣、若能人思奉職、各展其效、朕  
將冕旒垂拱、何憂不治哉、

詔樊子蓋

卿夙懷恭順、深執誠心、聞朕西巡、欣然望幸、丹  
款之至、甚有可嘉、宜保此純誠、克終其美、

又褒樊子蓋詔

車駕西巡、子蓋獻青木香、以禦霧露、及帝  
還、謂之曰、人道公青、定中比不、子蓋對曰、



臣等敢言清正是小不忍則亂大綱  
賄耳、賜口味百餘斛、又下詔

德齊禮實惟共治、懲惡勸善用明黜陟朕親  
巡河右觀省人風所歷郡縣訪採治績罕遵法  
度多蹈刑網而金紫光祿大夫武威太守樊子  
蓋執操清潔處涅不渝立身雅正臨人以簡威  
惠兼舉寬猛相資故能畏而望之不嚴斯治實  
字人之盛績有國之良臣宜加褒顯以弘獎勵  
可右光祿大夫太守如故賜縑千疋粟麥二千  
斛

加蘇威開府儀同三司詔

玉以潔潤、丹紫莫能渝其質、松表歲寒、霜雪莫能凋其采、可謂溫仁勁直、性之然乎、房公威器懷溫裕、識量弘雅、早居端揆、備悉國章、先皇舊臣、朝之宿齒、棟梁社稷、弼諧朕躬、守文奉法、卑身率禮、昔漢之三桀、輔惠帝者蕭何、周之十亂、佐成王者邵奭、國之寶器、其在得賢、叅燮台階、具瞻斯允、雖復事藉論道、終期獻替、銓衡時務、朝寄爲重、可開府儀同三司、餘竝如故、



以衛玄爲光祿大夫詔

近者妖氛充斥擾動關河文昇率勵義勇應機  
響赴表裏奮擊摧破兇醜宜升榮命式弘賞典  
可右光祿大夫

贈劉方上柱國盧國公詔

方肅承廟略恭行天討飲水遄邁視險若夷摧  
鋒直指出其不意鯨鯢盡殪巢穴咸傾役不再  
勞肅清海外致身王事誠績可嘉可贈上柱國  
盧國公

贈豆盧毓大將軍詔

褒顯名節、有國通規、加等飾終、抑推令典、毓深  
識大義、不顧姻親、出於萬死、首建奇策、去逆歸  
順、殉義亡身、追加榮命、宜優恒禮、可贈大將軍  
封正義縣公、賜帛二千疋、諡曰愍

改封豆盧毓雍邱侯詔

故大將軍正義愍公敏臨節、能固捐生殉國、成  
爲令典、沒世不忘、象賢無墜、德隆必祀、改封雍  
邱愍侯、復以願師承襲



追贈獨孤陔詔

外氏衰禍、獨孤陔不幸早世、遷卜有期、言念渭陽之情、追懷傷切、宜加禮命、允備哀榮、可贈正議大夫、

又

舅氏之尊、戚屬斯重、而降年弗永、凋落相繼、緬惟先往、宜崇徽秩、復贈銀青光祿大夫

責蘇威詔

威立性朋黨、好爲異端、懷挾詭道、徼幸名利、詆

訶律令、謗訕臺省、昔歲薄伐、奉述先志、凡預切  
問、各盡胸臆、而威不以開懷、遂無對命、啓沃之  
道、其若是乎、資敬之義、何其甚薄

徙衛王集滕王綸詔

綸集以附萼之華、猶子之重、縻之好爵、匪由德  
進、正應與國升降、休戚是同、乃包藏妖禍、誕縱  
邪僻、在三之義、愛敬俱淪、急難之情、孔懷頓滅、  
公卿議既如此、覽以潛然、雖復王法無私、恩從  
義斷、但法隱公族、禮有親親、致之極辟、情所未



忍可除名爲民遠徙邊郡

優突厥詔

突厥意利珍豆啓民可汗率領部落保附關塞  
遵奉朝化思改戎俗頻入謁覲屢有陳請以甞  
牆毳幕事窮荒陋上棟下宇願同比屋誠心懇  
切朕之所重宜於萬壽成置城造屋其帷帳牀  
褥已上隨事量給務從優厚稱朕意焉

答議突厥改服詔

突厥啓民表請乞依華夏服飾公  
卿請依所表帝以爲不可乃下詔

先王建國、夷夏殊風、君子教民、不求變俗、斷髮  
文身、咸安其性、旃裘卉服、各尚所宜、因而利之  
其道弘矣、何必化諸削任、縻以長纓、豈遂性之  
至理、非包含之遠度、衣服不同、旣辨要荒之敘、  
庶類區別、彌見天地之情、

賜啓民位侯王上詔

德合天地、覆載所以弗遺、功格區寓、聲教所以  
咸洎、至於梯山航海、請受正朔、襲冠解辮、同彼  
臣民、是故王會納貢、義彰前冊、呼韓入臣、待以



殊禮、寔厥意、利珍寶、啓民可汗志懷沈毅、世脩  
藩職、往者挺身違難、投足歸仁、先朝嘉此款誠、  
授以徽號、資其甲兵之衆、收其破滅之餘、復祀  
於旣亡之國、繼絕於不存之地、斯固施均亭育、  
澤漸要荒者矣、朕以薄德、祇奉靈命、思播遠猷、  
光融令緒、是以親巡朔野、撫甯藩服、啓民深委  
誠心、入奉朝覲、率其種落、拜首軒墀、言念丹款、  
良以嘉尚、宜隆榮數、式優恒典、可賜路車乘馬、  
鼓吹幡旗、贊拜不名位、在諸侯王上、

與高昌國王詔

彰德嘉善、聖哲所隆、顯誠遂良、典謨貽則、光祿  
大夫并國公高昌王伯雅、識量經遠、器懷溫裕、  
丹款夙著、亮節遐宣、本自諸華、厯祚西壤、昔因  
多難、淪迫獯戎、數窮毀冕、翦爲胡服、自我皇隋、  
平一宇宙、化偃九圉、德加四表、伯雅踰沙忘阻、  
奉賁來庭、觀禮容于舊章、慕威儀之盛典、於是  
襲纓解辮、削衽曳裾、變夷從夏、義光前載、可賜  
衣冠之具、仍班製造之式、并遣使人、郅頊將送、



被以采章復見車服之美棄彼黻黻還爲冠帶  
之國

陸參政集

卷全

三



勅

宣齊王勅

帝拜柳謩之爲齊王長史，帝法服臨軒，命齊王立朝堂之前，遣牛弘等引謩之詣齊王所西面立，  
宜勅謂王，

我昔階緣恩寵，啓封晉陽，出藩之初，時年十二，先帝立我於西朝堂，乃令高頴、虞慶則、元旻等從內送王子相於我，于時誠我曰：以汝幼冲，未更世事，今令子相作輔於汝，事無大小，皆可委之，無得近昵小人，疎遠子相，若從我言者，有益

於社稷成立汝名行如有不用此言唯國及身  
敗無日矣吾受勅之後奉以周旋不敢失墜微  
子相之力吾無今日矣若與謬之從事一如子  
相也

與柳謬之勅

今以卿作輔於齊善思匡救之理副朕所望若  
齊王德業脩備富貴自當鍾卿一門若有不善  
罪亦相及

勅度四十九人法名



皇帝勅皇帝敬問括州國清寺沙門智越法師  
等。僧使智瓌至、得書具至、懷天台福地、實爲勝  
境、所以敬爲智者建立伽藍法緣、旣深、尊師義  
重、欲使宗匠遺範、奉而弗墜、菩薩淨業、久而彌  
親、然則去聖久遠、學徒陵替、規求利養、不斷俗  
緣、滋味甘腴、違犯戒律、此乃增長罪垢、豈謂福  
田、師等離有爲法、求無上道、棄俗諸漏、鑑在雅  
懷、由須獎訓、未學弘脩淨行、俾夫法門等侶、咸  
歸和合、諸佛禁戒、畢竟遵行、又此寺嘉應、事表

先覺既理由冥感卽號國清寺并有施物用申  
隨喜冬序甚寒道體清豫朕巡省風俗爰屆江  
都瞻望山川載深勞想故遣兼通事舍人盧政  
力往指此不多

行道度人天下勅

大業三年正月二十八日菩薩戒弟子皇帝總  
持稽首和南十方一切諸佛十方一切尊法十  
方一切賢聖僧竊以妙靈不測感報之理遂通  
因果相資機應之徒無爽是以初心爰發震動



波旬之官、一念所臻、咫尺道場之地、雖則聚沙  
蓋鮮、實覆簣於耆山、水滴已微、乃濫觴於法海、  
弟子階緣宿植、嗣膺寶命、臨御區宇、甯濟蒼生、  
而德化弗弘、刑罰未止、萬方有罪、實當憂責、百  
姓不足、用增塵累、夙夜戰兢、如臨淵谷、是以歸  
心種覺、必冀慈愍、謹於率土之內、建立勝緣、州  
別請僧、七日行道、仍總度一千人出家、以此功  
德、竝爲一切上及有頂下至無間、蜎飛蠕動、預  
稟識性、無始惡業、今生罪垢、藉此善緣、皆得清

淨三塗拱獻六趣怨親同至菩提一時作佛



璽書

降來護兒璽書

公旋師之時、是朕勅公之日、君臣意合、遠同符契、臬此元惡、期在不遙、勒名太常、非公而誰也、

答突厥啓民璽書

磧北未靜、猶須征戰、但使好心、孝順、何必改變衣服也、

古賦並

詩並

書並

樂並

禮並

刑並

雜並



檄

遺陳尚書江總檄

南北雖殊，風雲在望，載懷虛遲，寤寐爲勞，獻歲  
猶寒，比當清豫，匡贊乎國，良亦慤勤，寡人忝膺  
朝寄，董律專征，跋涉山川，今次江際，公等文儒  
自立，器用適時，冠蓋二世，齒德兼重，孔老殊教，  
名墨異家，金匱珠韜，銀編玉策，莫不騰於舌杪，  
散在筆端，邃古成敗之機，近代安危之跡，照同  
懸鏡，明若觀火，無待指南，自應神悟，猶恐思之

未審差以毫釐聊煩翰墨略申梗概自窮吳生  
民樹之司牧義軒以降書契可紀咸一姓承立  
四海無兩帝漢道云季三方鼎立時惟版蕩世  
匪休明當塗起而蜀亡典午興而吳滅永嘉喪  
亂紫宸曠主劉石苻姚之儔僞夏僭燕之醜妄  
塵大寶事乖圖錄魏室乘時兆基朔野經始嵩  
洛未暇江湖有周受命敵非齊氏務在兼并不  
遑外略蕞爾吳越自相君長竊擬王者之儀妄  
談天子之氣偷安假息綿歷世祀我大隋之肇



開寶祚光有神州皇帝感曜魄之靈應太微之  
座千年啓聖萬代一時深仁至德甯濟羣品越  
海窮河東漸西被旄頭之屬歷代之霸作我臣  
民匍匐服裝惟彼江表獨隔皇風夫物極則反  
否終斯泰郭璞有云年經三百天下大同茲實  
立運已定於前聖主膺期而出欲以區區之陳  
國違上天之冥數其不可存者一也大必包小  
天地之常規明能通暗日月之常理論道德以  
唐陶而征有苗語衆寡舉海內而當羣小在長

江舟楫之用、矜其積習、而山川共有、我據上游、  
鼓棹之能、吳楚不異、高艫巨舫、東西萬里、扼喉  
撫背、水陸千途、彼之兵士、不過十萬、首尾分布、  
所在危急、加以屯戍邊方、淹積歲序、風雨以爲  
櫛沐、蟣虱生於甲冑、望我寬仁、思倒戈戟、通在  
戎行、更成敵國、守以時月、則魚爛土崩、接以鋒  
刃、則鳥驚鹿走、理在必然、不假枚卜、此不可存  
者二也、豐侯好酒、實喪厥邦、梁伯役民、潰其宗  
社、彼之僞主、覆車是襲、日夜沈湎、曾無節度、繕



造宮室、莫知窮已、竭四民之產、荒縱其心、歛百  
姓之哀、以爲已樂、寶衣玉食、填積後宮、短褐麤  
簞、不充編戶、一芥之善、蔑爾無聞、五子之歌、宛  
然悉備、雖欲勿喪、其可得乎、此不可存者三也、  
僞主忌能、護短、酷法淫刑、骨鯁之臣、盡見疎斥、  
諫諍之士、皆被屠害、遐邇結舌、衣冠解體、人妖  
鬼怪、觸類呈災、稚齒耆年、咸知殘滅、此不可存  
者四也、以此小邦、攝於大國、邊烽夜動、照彼都  
城、戍鼓晨嚴、震其宮殿、累基十二、方此未危、懸

縷千鈞、比斯非切、而莫知憂恐、更自驕矜、曾無  
事大之心、專行犯上之志、侵軼我邊鄙、招納我  
叛亡、國家爰自受命、每從含養、敦以鄰睦、申其  
聘好、冀能守彼宗祊、靜其疆域、而長惡益甚、縱  
毒彌深、吳會雄俊之人、湘郢耿介之士、乞師請  
命、盈庭滿闕、帝乃憫然、矜彼黎獻、授鉞推轂、弔  
民伐罪、已有別詔、惟廢僞主之身、自餘士庶、普  
從肆責、向所陳說、咸是格言、非曰游談、共相欺  
誤、且劉叔納譙周之計、而獲存孫皓、用薛瑩之



詞而致福此二子者終有良臣之譽皆無陷君  
之譏何則所恥者小所存者大若憲章往彥聿  
遵前軌則爲主享封侯之業祖禰延血食之期  
江東士民寔受其賜公等身保榮貴名垂竹帛  
豈不美歟若膠柱不移守迷莫變率其蟻衆敢  
拒王師軍有常刑悔無及矣禍成俄頃宜早圖  
之使人今還遲有委曲言不盡意豈復多云楊  
廣白





令

# 與天台山衆令

仁壽元年正月、永嘉僧法曉生聞智者勝德、特至龕所、旋繞千拜、一夕龕戶自開、光照林木、衆其瞻禮、又張造者年邁足蹙、登龕拜祝、願得度脫、忽聞龕中應聲、及以彈指灌頂等啓聞、皇太子與書、

僧使灌頂智瑑至覽十一月三日書并陳靈龕應迹顯形放光彈指流音應念傳響斯實不思議力變化多方感悟有緣示希有事慎終追遠感歎相深在昔雙林示滅非滅多寶獨塔俟時

涌現爰在狼迹迦葉分身乃至鷲山迦文留影  
眉毫散彩指端震室豈非像教能度無邊是大  
因緣聞善知識永惟宿昔獲承師範德音盈耳  
神光在目方憑靈瑞係踵菩提肅承靈誥宣慰  
南服山衆法徒同志爲友曾成等侶方共舟航  
歲暮凝寒念皆道勝天台名嶽海岸所推脩建  
大林多慙重閣三時設供四事不周想甘禪悅  
以同法喜其間敬德信次相聞今遣員外散騎  
侍郎張乾威送僧使還山于舊所設供庶同甘



露能變龕澁亦憑香積證道融銷書不盡言反

此無悉楊廣和南

僧使灌頂等所領今施物目仁壽元年十二月十七日

白石香爐一具并香合一枚大銅鐘一只鷄納

袈裟一領鷄納褊袒二領四十九尺幡七只黃

被裙一腰氎二百領絲布祇支二領小幡一百

口和香二合胡桃一籠衣物三百段柰麝一合

石鹽一合

酥六餅

附錄彙集

卷全



書

遺史祥書

煬帝初爲晉王，祥從擊突厥於靈武，破之。  
遷右衛將軍，屯弘化，備胡。時帝在東宮，遺  
祥書，

將軍總戎塞表，胡虜清塵，秣馬休兵，猶事校獵。  
足使李廣慙勇，魏尚媿能，冠彼二賢，獨在吾子。  
昔余濫舉，推轂治兵，振皇靈於塞外，驅犬羊于  
大漠。于時同行軍旅，契濶戎旃，望龍城而衝冠，  
盼狼居而發憤。將軍英圖不世，猛氣無前，但物

不遂心、僂俛從事、每一思此、我勞如何、將軍宿  
心素志、早同膠漆、久而敬之、方成魚水、近者陪  
隨鑾駕、言旋上京、本卽述職南蕃、宣條下國、不  
悟皇鑒曲發、備位少陽、戰戰兢兢、如臨冰谷、至  
如建節邊境、征伐四友、褰帷作牧、綏撫百姓、上  
稟成規、下盡臣節、是所願也、是所甘心、仰慕前  
脩、庶得自效、謬其入守神器、元良萬國、身輕負  
重、何以克堪、所望故人、匡其不逮、比監國多暇  
養疾閑宮、厭北閣之端居、罷南皮之馳射、博望



之苑。既乏名賢。飛蓋之園。理乖終實。親朋遠矣。  
琴書寂然。想望吾賢。疹如疾首。

遣延智顓書

帝晉王時爲揚州總管。遣使奉迎師曰。我  
與晉王深有緣契。卽束衣順流。不日而至。  
王請受菩薩戒。顓謂王曰。大王紆遵聖禁。  
可名總持。王贊。顓曰。大師傳佛法燈。宜稱  
智者。自後王諸書往來。皆  
稱弟子總持。稱師爲智者。

金風御節。玉露調時。道體休和。安樂行不。法師  
抗志名山。棲心慧定。法門靜悅。戒行熏脩。籍甚  
徽猷。久承音德。欽風已積。味道爲勞。冀託舟航。

用披雲霧故遣使人往彼延屈希能輕舉以沃  
虛襟伫望來儀不乖眷意也弟子楊廣和南

治禪衆寺答智顗書

顗受戒既畢出居城外禪衆  
寺開皇十二年復還廬山

深具謙挹之旨但高人游處觸地是安然法宇  
僧坊須盡嚴正經云四事供養一不可虧已勅  
有司脩葺願忘懷受施也弟子楊廣和南

法諱奉智者書

弟子總持和南柳顧言還奉旨垂示六種捨施



及留受用弟子一日恭嚬猶以陋薄不稱宿心  
來旨既以轉施功德彌爲增上悲敬福田深是  
平等固非蔽識所能周見事事仰依其所留者  
既以不多願恒留受用故遣報諮謹和南

叅智者書

弟子總持和南履長戒辰在俗咸慶伏惟吐納  
禪慧與時休和弟子稟受以來粗堪靜攝謹遣  
叅承謹和南

請留智者書

開皇十一年十一月，受晉王戒畢，出居禪衆寺，卽欲西上。王遣柳顗言致書，請留待來年二月，約至棲霞送別。又宣口勅云：智者爲當長去，更有還期。弟子意不欲相去，遼遠脫能旋迴，不敢留停。鎮下近山，隨樂住止。又欲奉留，待二月十八日，同度延陵鎮，仍共至棲霞履行。於彼送別。十二年三月，顗將啓行。王復致書，請就攝山安居。度夏，顗不許。王命有司具裝發遣，顗遂至止廬山。

弟子總持和南爰逮來誨，須往荆楚，辭致首尾仰具高懷。但祇稟淨戒，事成甫爾，宿昔凝滯，匪遑諮決。闍黎和尚經稱勝田種子，雖投嘉苗，植方用心，形求伸供養，庶憑善誘，日灑塵勞，



厥共緣、依止有地、斯亦舟航兼運、利益弘多、如  
來化導、何必止還、天竺菩薩應變、本無定方、深  
願坦然、以虛受物、遲延展禮、面當諮遜、謹和南  
重留智者書

弟子總持和南、逮旨須取明二日垂別、脩復未  
周、便深傾欵、弟子前昨晝夜熟更惟忖、智者至  
止以來、未經一夏、兼荆潭路遠、安居將促、江波  
浩蕩、行程難期、旣去此處、又不至前所、半途結  
夏、投止亦難、又按經律、一夏供養安居、僧福田

無量、況乎師道及大衆力、凡夫淺薄、本資勝緣、  
菩薩大慈、須受應供、暮春行謝、首夏向臻、九旬  
忽違、四事虛棄、脩心與理、於情匪安、今欲仰畱  
度夏、發遣冀不半途飄落、脫疑邑下喧湫、須依  
林壑、安居攝山、亦當爲便、若法歲將滿、預勒蔣  
州、裝船南出、石頭西游、彌易旣乘、爽節因得、順  
風去、留之宜事理、咸會此間、彼處仰聽、擇一意  
不可盡、辭豈多宣、謹和南

三月  
一日

許智者行書



弟子總持和南復逮今旨欲遂前心功德因緣  
豈敢違忤謹遵宿願卽命所司發遣發日離晨  
仰聽詳擇庶解夏非遠秋水乘流賜答來期必  
當無爽用茲歡喜蠲悲歎謹和南

謝法門書

弟子總持和南奉旨今日齋竟卽事登舟睽阻  
方遙彌以傾欬垂示法相雖文旨淵蹟源本難  
尋而教門方便開悟易益恭承善誘永以受持  
庶藉津梁得無退轉自服膺至道每沾弘護將

事遵途復降良藥沐浴慈被伏用悽荷謹和南

### 遣使往匡山叅書

開皇十二年七月王遣書廬山叅省八月  
顓往衡山營建功德十一月王遣書潭州  
奉迎十二月至荊州創立玉泉寺

弟子總持和南親信傳仲詵還逮去月朔告用  
慰延結熱猶熾願道體休和仰承經過攝山鍾  
岫寺塔安善徒衆和肅仍留二十僧權停開善  
進至匡嶽結夏安居東林禪閣還爲一寺峰頂  
精舍復皆隨喜敬緣勸發獲此熏脩用禱身田



方流法雨，金光明福，喜荷彌深。弟子去月十四日，始度朱方，風土異宜，流金在節，攝衛多不調適，每有劣然。二十九日來，石頭稍已平復，自江浦違心，馳情鼓蠡，以日爲歲，無時暫忘，願未解夏前，預整裝束，法歲若滿，卽事西浮。彼間酬願務令在促，非但弟子蔽識，希護周爰，深恐禪慧學徒咸思鑽仰，宣尼在陳，致嘆自衛，便歸。屈道紆情，事非爲已。今遣主簿王灌指往祇承，并貢別牒，用忘存省，敢略繁辭，謹和南

七月一日  
法衣六件，鹽

一百斛米  
一百斛

重遣匡山叅書

弟子總持和南東林山寺使至，逮八月八日，誨  
用慰馳結，仰承已往衡山至當稍久，法緣若竟  
願卽沿流，冀在歲陰，必期展覲。弟子渡江還去，  
月初移新住，多有造次未善，安立來旨，勗以法  
事，實用慙悚。始於所居外，援建立慧日道場，安  
置照禪師以下，江陵論法師亦已遠至，於內援  
建立法雲道場，安置潭州覺禪師以下，卽建深



善輒以諮知仰承相次爲營功德深荷扶助難  
用遠陳而發此至江州遂下請僧料云何能得  
相資前施鹽米其米迴入東林鹽以上路盈長  
之外乃可別營功德今山僧返路行用仰酬尋  
別遣使迎延願預整歸計江山遼曩豈盡誠曲

謹和南

十月十日

答智顓述匡山寺書

弟子總持和南垂誨述江州潯陽廬山東林寺  
峰頂寺須令弟子立爲檀越主山嶺盤秀下屬

江湖香爐層峰上，虧雲日，仙人之所戾止，隱淪  
於焉不歸，況乎慧遠法師勝依結構，謝客梁元，  
穿池重閣，景師息心，神應峰頂，智者憩歷，踵武  
前賢，師嚴道尊，實深隨喜，所恨寡薄，無益將來，  
庶藉熏脩，方證常樂，兼陳二寺，偏近驛道，行人  
往來，頗成混雜，須勅彼州，令去公私，使命不得  
停止，卽付所司，依事頒下，謹和南

三月一日

與匡山三寺書

極暄法師道體何如，衆內咸宜也，鴈門遠法師



四依菩薩、翻飛朔野、棲息南山、自斯以後、名德  
相繼、智者見令爲寺檀越、顧脩寡薄、非敢克當、  
獎導旣引、良深隨喜、敬德指此承問、楊廣和南  
三月二十一日

與峰頂寺書

暮春暄和、寺衆清勝、禪悅法喜、致足恬懷、鑪峰  
香氣、烟霞共遠、智者經託勝地、爲在總內、令爲  
檀越、誠深隨喜、更追厚愧、善當敬勗、楊廣和南

三月二十一日

與禪閣寺書

春序將謝，道體何如？僧衆清善，匡山佛事興自  
慧遠法師，法師師於彌天道安，安師師於佛圖澄  
妙德相承，莫之爲最。江東龍藏，悉本鴈門。鴈門  
上人，創迹廬阜，自梁及晉，止有東林。陳晚澆漓  
別生禪閣，僧徒好異，豈稱至和智者？爰居還須  
合、一、想、均、願、海、更、無、異、味、行、人、將、送、過、指、此、相

聞楊廣和南

三月二十一日

入朝遣使叅書



弟子總持和南仰違移歲，馳誠載勞，兼事入朝，  
彌增延屬，武關雖阻，荆近於吳，是以暫停陝州，  
遣使承接，行人返命，具奉覲縷，非惟年尊疾動，  
又以結夏安居，理事相推，固須停止，弟子還鎮，  
非久，便願沿流，仰會江都，庶應旦夕，將聖德果，  
亦復差機，因緣多端，請不勞慮，謹和南

九月十日

又

弟子總持和南僧使智邃來，奉五月二日誨，用  
慰馳結，仰承衡嶽功德圓滿，便致荆巫，履涉虧

和深以傾悚，弟子於江都入朝至陝，關眩瞽倮，  
岐陽腹內，又不調適，去月未還，京輦如欲相承，  
猶自羸薊，未卽祇覲，望雲延願，珍納行人，今返  
辭，豈宣具謹和南。

又

顓遺智邃奉書上玉泉伽藍圖并求南  
衡禪師碑因獻萬春樹皮袈裟王答書

弟子總持和南，奉旨於荊州當陽縣境玉泉山  
陁爲建造伽藍招提行道圖，寫地形，具以賜示。  
伏以布金徧地，買園建立，奉置三尊，永流萬代。  
唱誦所不能讚，算數所不能量，孰意經教，頭蒙



和造循復來旨爽然失厝既事出神心理生望  
表無容違拒苟作形迹卽具聞奏嘉號乃覃名  
符天冠道場聲滿恒沙世界福報仰歸遜辭難  
涉謹和南

又

弟子總持和南垂旨令撰衡嶽禪師碑文郭有  
道之無愧辭高德逾此陸士衡之披文想質弟  
子多慙既蒙獎成不無尅勵邯鄲絕妙深恐難  
工還鎮病瘳庶或勉強循覽行狀用難思議佛

澄道安甯復過是謹和南

又

弟子總持和南垂賜萬春樹皮袈裟一緣述是  
梁武帝時外國惟獻四領今餘一而是建初烏  
瓊法師所披謹尋菩薩戒稱所著袈裟皆染使  
壞色況復自然嘉樹妙彩天成相應之言無勞  
外假萬春表長生之稱二翼合善譬之辭永服  
周旋恒充布薩常事半月豈惟元日著如來衣  
深荷慈獎謹和南



又

弟子總持和南率施別牒五彩旛錦香爐檀等

十種示表微誠薄申法貺

五色

四寸九尺旛二張五色斑羅經巾二枚絹五十

疋錦香爐檀十張熏陸香二觔剃刀十口鷄納

袈裟一領油鐵鉢十口雄黃

七觔青須彌氈五領右牒

### 遣使荊州迎書

開皇十三年二月王入朝  
行次陝州遣書荊州迎顓

弟子總持和南暄和道體勝愈仰揆衡嶽法事  
久當圓滿江陵功德復應成就隨喜之至難用

勝言。弟子今入朝覲，行次陝州，馳仰之誠，與時而積，故遣使人迎候，希便進道。來月下旬，惟遲祇接，路首恩促，豈復委宜。謹和南

二月二十日

遣使潭州迎書

弟子總持和南歲事云：暮寒氣殊重，禪悅經行，願常安樂。弟子頃來，每多勞疾，但睽覲稍久，惟用傾結，仰度所營功德已當，究竟今遣左親使伏達奉迎，願便事沿流，延遲諮具。謹和南

十二月初



在京遣書

弟子總持和南仰違已久，馳係實深，獻歲非遙，  
傾遲虔禮。暮春屆節，當遣奉候。謹和南

九月二十四日

在京重遣書

弟子總持和南適逮近旨，用慰馳情。春暄願道，  
體康勝。玉泉創立道場，嚴整禪衆，歸集靜慧，日  
新，隨喜之深，難以辭諭。弟子始服三石散，竟調  
息勞心，秋仲歸蕃，請夏訖沿下，在干拜覲，差當  
匪奢。其間珍德，今遣統軍魯子譽往祇承。謹和

南

從駕東岱於路遣書

弟子總持和南仲秋轉冷仰惟道體康愈弟子  
即日粗可行未由虔禮但增延結願珍德謹遣  
脩承謹和南

於路次書

弟子總持和南寒氣漸嚴仰惟康愈動寂怡神  
興居安悅弟子陪奉鑾駕旅次長奉遠憑勝力  
行往安隱瞻言祇覲庶或匪遙願今重七不宣



具謹和南

九月十九日

還藩遣迎書

開皇十五年春晉王久留京師將還鎮遣使奉迎顓乘流東下止揚州禪衆寺王奉書求學禪慧顓書答之後三日王復重請乃以所著淨名義疏初卷奉王

弟子總持和南獻歲春明仰惟道體勝豫禪悅法喜衆咸集業功歸有在悉由明導敬憶江東暫欲西上先到衡嶽用賽師恩次往渚宮以報生處虔承此旨衛送大江陽子臨流具申來請卽蒙開許還至觀濤年來歲往寒暑屢變恭聞

功德圓滿、遠難讚述、弟子多幸、生在佛家、過庭  
所聞、匪直詩禮、轉輪斯奉、實惟旦暮、今者陪扈  
鑾駕、軼發自京師、言停洛陽、又止厯下、柴望之  
禮、本自虞書、巡會之聲、盛於姬典、至尊憲章、先  
古、允叶人神、相風指南、奉朝東岱、以今月十一  
日吉辰、宗事云畢、於時天地載廓、日月增華、休  
氣神光、燭近被遠、靈芝競吐、山谷連木、竝秀宮  
壇、瘖聾朦瞆之徒、無鑒而自愈、扶老携幼之侶、  
不謀而同到、臣子殫見、事非虛飾、一物得所、萬



三斯應師資至重敢不稍聞第率從便蕃卽辭  
行所夾鐘將末必屆揚州今遣奉迎便願沿下  
餘春未盡必希拜覲其間珍德續復祇承謹和

南

正月二十日

謝天冠仍請淨名義書

總持和南前揆菩薩天冠率爾式之樣深嫌不  
工卽用呈簡爰逮今製思出神衿圖比目連妙  
逾郢匠開士五明此居其一金剛種智茲焉標  
萬是智因地化物不可思議接引隨方多能盡

達冠尊于身，端嚴稱首，跪承頂戴，覽鏡裴徊，有  
飾陋容，增華改觀，弟子多幸，謬稟師資，無量劫  
來，悉憑開悟，色心無作，觸仰勝緣，度脫舟航，何  
慮不果，但戒爲基，趾信實行，先保解毗尼，昔年  
虔受身，雖疎漏，心護明珠，而定品禪，枝屏散歸，  
靜猥以凡薄，荷國鎮蕃，爲子爲臣，難虧難怠，豈  
藉四緣，能入三昧，此非臆斷，實荷誠說，經稱非  
禪不智，非智不禪，定解相資，能證無漏，又電光  
斷結，其例甚多，慧解脫人，厥朋不少，卽日欲服



庸智斷率先名教永泚法流兼同治國未知底  
流可開化不師嚴道尊可降意不宿世根淺可  
發萌不菩薩應機可逗時不若未堪敷化且暫  
息緣如可津梁便開祕藏書云民生在三事之  
如一況覃釋典而不從師今之慊言備漚素款  
成就事重請棄飾辭謹和南

六月二十一日

重與智者請義書

弟子總持和南仰逮還旨猶秉謙尊循復久之  
恍如自失切以學貴承師事推物論厯求法緣

厝心有在若習毗曇則滯有情著若脩三論又入空過甚成實雖復兼舉猶帶小乘釋論地持但通一經之旨如使次第徧脩僧家尙難盡備況居俗而欲兼善當今數論法師無過此地但恨不因禪發多起諍心達者無違求那明偈仰惟厚習善根非一生得初乃由學俄逢聖境南嶽禪師親所記蒞說法第一無以仰過照禪師來具述此事于時心喜已域寸誠智者昔入陳朝彼國明式瓦官大集衆論鋒起榮公強口先



被折角。兩瓊繼軌。裁獲交綏。忍師讚歎。惟唱希  
有。弟子仰延之始。便事勝集。屈登無畏。釋難如  
流。親所聽聞。衆咸瞻仰。適承前往荆楚。講法華  
經。舊學名僧。莫不歸服。故知非禪不智。驗乎金  
口。比聞名僧所說智者融會盡有。階差譬若羣  
流。歸乎大海。此之包舉。始得佛意。弟子卽日而  
不依請。譬彼彌勒。今當問誰。惟願未得令得。未  
度令度。樂說無窮。法施無盡。復使願言。稽首虔

拜。謹和南

六月二十五日

謝義疏書

弟子總持和南逮旨送初卷義疏、跪承法寶、粗  
覽綱宗、悉檀內外、耳未曾聞、故知龍樹代佛、不  
可思議、今所著述、肉眼未覩、明闇、謹復研尋、遲  
比覲接、謹和南

論荊州諸寺書

顓以荊州立玉泉及所脩十住寺、請王爲  
檀越、王卽移書達荊州總管、嘗令檢校、復  
致書勸留  
顓後答書、

弟子總持和南荊州玉泉十住兩寺近旣賜令



檢校令須書及江陵總管當勒所由終聽僧使  
奢促弟子仰蒙淨戒宿世因緣稍希義理智波  
羅密爰降開許始制義疏方憑沃啓向入慧門  
昔年仰請棲霞時往觀行政爲密邇朝發暮到  
應可諮決不異邑居行道本貴安心甯勞過遠  
天台之路幸願輟情屈已爲人菩薩有賜于專  
契弗敢違前都不知淨人善心已墮僧數濟度  
無隔惟用隨喜謹和南  
七月二十七日

復答智者書

總持和南復垂誨旨益具仁慈開士虛懷隨感  
必應本誓願力何患不果政言服道日淺未堪  
違遠深憑護念開示悟入玉泉十住天台本居  
仰由勝功能得建立方須影響永至金剛江陵  
書及會稽教下竝勅所司以時發遣謹和南

七月

二十  
九日

與荊州總管達奚儒書

智者禪師德尊望重近年紆道爰授淨戒今脩  
治彼州十住寺造立西徂玉泉寺竝見請爲檀



起復聞公等多結勝緣大乘運通良深隨喜師  
今遣僧使志果法才二人還就玉泉寺法燦道  
慧法師十住寺道臻法師經理想加心影響獎  
成妙業公私覃福幽顯同賴法事遠白不復暗  
涼也楊廣白

八月二日

迎智者入城礙雨移日書

總持和南方要仰延雨乃暫阻明間若晴別當

遣信謹和南

七月二十六日

次迎入城書

總持和南霜寒道體康勝弟子還來甫爾未暇  
迎延馳誠已深今遣候接冀近祇覲謹和南

九月

十六日

### 答智顗蔣州事書

弟子總持和南爰逮高旨騰蔣州僧所及竊以  
僧居望刹食惟分衛所立精舍本依聚落近年  
奉詔專征弔民伐罪江東混一海內又甯塔安  
其堵市不易業斯亦智者備所明見而亡殷頑  
民不慙懷土有苗恃險敢恣螳螂橫使寺塔焚



如此屋流散鐘梵輟響雞犬不聞廢寺同於  
空宅持鉢略成空返僧衆無依實可傷歎彼地  
福盡方成邱墟所餘堂塔本不壞毀其有現僧  
亦許房住惟虛廊檐宇會當倒壓所以移來還  
克寺館其外椽版權借築城若空寺步廊有完  
全者亦貸爲府廨須一二年間民力展息卽於  
上江結筏以新酬故本勅所司具條孔目無慮  
零漏恐遠僧未能曲見頓用仰誣必願言提冥  
諸其掌猥延滿軋戀側良深謹和南

遣使入天台叅書

總持和南麥序氣清道體和適福慧莊嚴與時  
高勝弟子至來未久麤復可行近頻降雨書爰  
垂示功德玄義刪削文句入初其舊維新從麓  
至妙會須披接方豁煙雲春律已謝夏坐方結  
敢違經教涉暑出迎白露宵團秋風葉下必預  
舟楫迎覲江陽然仰勞著述已涉數載般若多  
障近願成功日就月將庶方啓沃率貢別牒示  
表虔誠在敬無文仰揆弘亮其間珍德續事音



和南

綱架紫十領龍鬚席二領須彌璽二領貓牛酥三瓶熏陸季一合

遣使入天台迎書

總持和南霜氣已繁蚊熱久祛方恐洞汙預取

調適今遣奉迎祇禮非奢謹和南

九月二十二日

遣使叅病書

開皇十七年王使入山迎顓行次石城乃  
稱有疾遣醫往治或請進藥及齋竝不聽

總持和南仰承出天台已次到剡石城寺感患

未歇菩薩示疾在疾亦愈但於翹誠交用悚灼

今遣醫李膺往處治少得康損願徐進路遲禮

觀無遠、謹和南

答智顗遺旨書

菩薩戒弟子總持稽首和南先師天台智者內  
弟子灌頂普明至奉去十七年十一月二十一  
日遺書七紙手迹四十六字、并淨名義疏三十  
一卷、犀角如意、蓮華香爐等、跪對脩讀、摧振十  
心、舍利儼然、德音具在、迦葉狼迹、身證遙追、曇  
光天台、安禪近躡、誠復如來雙林、四部號慟、而  
涅槃遺教、法更殷重、況乎五百歲後、四依拯溺



深順佛旨居世同凡將欲泥洹現希有事五品  
十信已自皎然彌陀觀音親來接引去德茲永  
乃增悲戀追悟今生還慶夙稟所恨淨名經疏  
不重親承由冀尋研用補咎悔追惟障惱現機  
未發逃聽前聞亦有成就非徒悟有淺深抑又  
時或早晚佛滅度後得聖巨多道躍他方冥來  
曉示在思卽世忽奉大師良由宿緣積曾親近  
愛覃來命必垂影響不捨本誓筆迹具存是用  
歸誠憑靈戒懇跪受經疏如意香爐虔禮西方

心口相誓、手探卷軸、最後殷勤、卽于今月十八  
日、仍感瑞夢、是知濟度、已降舟航、惟願卽日在  
寶池、遙開蓮華、今居淨域、近漑濁心、世世生生  
師資不闕、革凡登聖、給侍無虧、但義府鈎深、遺  
文淵博、雖加策駘、終畏面墻、特希漑以醍醐、如  
出香乳、照以暗井、卽顯真金、然後仰藉神通、俯  
勵精力、別詢名僧、奉揚法味、普共含生、作大利  
益、斯則弗違提獎、同登彼岸、最勝最上、就此爲  
尊、灌頂所送、最後淨名義疎三十一卷、至佛道



品謚卽裝治善書習讀逮旨爾前立義及入文  
解釋付弟子焚之卽付還使遣對燒蕩犀角如  
意蓮華香爐遠以垂別輒當服之無斃永充法  
事今奉施甕瓦香爐供養龕室遺旨以天台山  
下遇得一處非常之好垂爲造寺始得開翦林  
木位置基階今遣司馬王弘創建伽藍一遵指  
畫寺須公額并立嘉名亦不違旨佛隴頭陀竝  
各仍舊使移荊州玉泉十僧守天台者今山內  
現前之衆多是渚官之人已皆約勒不使張散

豈直十僧而已所求廢寺水田以充基業亦勅  
王弘施肥田良地深蒙擁護當年別資給行送  
經一藏依法爲先師別供養具鐘幡香等又施  
錢直且充日費鄮境靈塔吳內石像剡縣彌勒  
尊儀卧疾之處竝使裝飾亦不仰異荊州玉泉  
寺旣是爲造理當異餘道場其潭州大明寺荊  
州十住上明寺等先以敬許爲檀越無容復乖  
今誨使製南嶽師碑卽命開府學士柳顧言爲  
序自撰銘頌所囑僧有罪治無罪平等切以涅



樂羯磨經有誠文正論治國金光明品住持三  
寶弗敢墜失又令加脩慈心撫育民庶犬馬識  
養人豈忘恩蓋聞外書爲教仁尙恕物內典居  
宗大慈爲首在文雖異諸理實同不有君子其  
能爲國不有菩薩豈濟含生又以僧未貫籍許  
其出首適奉詔書冥符來及見機而作所謂後  
天而奉天時糧運轉輸深關軍國前已表聞所  
司未報終當方便必期諧果及承寄囑斯復能  
照他心前來仰答無違意旨庶藉熏脩福祐國

家灌頂普明、面引詢訪、具述遺形、宴坐宛若平  
生轉恨失時、不重餐義味、仰揆定力、如須彌峙  
法臘云、竟切願輿、迎一到江陽、還入禪衆、道俗  
接足、人神頂禮、卽當奉送、復彼山龕、庶藉瞻仰  
能開心目、深願道力、不孤所請、雖厚恩申、報具  
在願文、而實宜加護、實須酬仰、二僧今反、輕奉  
報書、遠拜靈儀、心載嗚咽、謹和南

開皇十八年  
正月廿二日

智顗終後弔山衆書

正月二十九日總持和南白諸行無常、是生滅



法諸佛及緣覺、尚捨無常身、大師智者移應遷、  
神哀摧抽惱、不能自勝、念當戀慕追慟、難忍永  
矣、奈何當復奈何、侍者灌頂普明二人賁送別  
書、觀心論淨名疏、犀角如意蓮華香爐并智越  
法師一衆啓、見對增哽、德音若存、卽遣條流移  
神靈迹、祥瑞炳著、自述分明、舍利全身于今安  
坐、非證聲聞小果、定入菩薩大位、素聞得法華  
三昧、方驗不退法輪、面覩彌陀、觀音大勢、至以  
宿命智、反照斯土四部弟子、豈不努力、自揆寡

薄無以申報、唯當敬依付囑、不敢弭忘、應建伽  
藍、指畫區域、須達引繩、天官卽應至金剛際、旣  
有要道、當建繕造、一遵本意、昔宣尼忘沒、弟子  
守墓三年、子貢之徒、乃至六載、況乎方置精舍、  
永樹福基、彼現前僧、慎勿張散、但使謀道、何患  
無食、期取來生、西方非遠、必若懈退、寶池極遙、  
今遣使人于佛隴峰頂、虔誠懺禮、脩福建齋、具  
如願文、略伸鄙意、二僧今返、特此慰書、楊廣白



遣使入天台設周忌書

王遣典籤吳景賢入山  
以諱日設五百衆齋

歲序推移、日月如逝、智者遷化、已將一周、追深  
悲痛、情不能已、念慕感慟、何堪自居、今遣典籤  
吳景賢往彼設齋、奉爲亡日追福、遲知一二、楊  
廣和南

開皇十  
八年

賜釋慧覺書

法師安善、涼暑惟宜、承栖遲龜山之域、闡揚龍  
樹之旨、其義端雄辯、獨演暢於稽陰、談柄微言

偏引汲於鏡水弟子欽風籍甚味道尤深今於  
城內建慧日道場延屈龍象大弘佛事盛轉法  
輪上人名稱普聞衆所知識今遣迎候遲能光  
拂也

請釋灌頂書

夏序炎赫道體休宜禪悅資神故多佳致近令  
慧自道場莊論二師講淨名經全用智者義疏  
判釋經文禪師既是大師高足法門委寄今遣  
延屈必希霈然并法華經疏隨便入京也但遲



來儀書不盡意

召徐則書

則東海剡人陳時隱天台山絕穀養性惟資松朮初在縉雲山太極真人徐君降之日汝年出八十當爲王者師然後得道也晉王廣鎮揚州知其名手書召之則謂門人曰吾今年八十一王來召我徐君之旨信而有徵遂詣揚州

夫道得衆妙法體自然包涵二儀混成萬物人能弘道道不虛行先生履德養空宗玄齊物深曉義理頗味法門忱性冲和恬神虛白餐松餌朮、栖息煙霞望赤城而待風雲游玉堂而駕龍

鳳雖復藏名台嶽，猶且騰實江淮，籍甚嘉猷，有  
勞寤寐，欽承素道，久積虛襟，側席幽人，夢想巖  
穴，霜色已冷，海氣將寒，偃息茂林，道體休念，昔  
商山四皓，輕舉漢庭，淮南八公，來儀藩邸，古今  
雖異，山谷不殊，市朝之隱，前賢已說，導凡述聖，  
非先生而誰，故遣使人，往彼延請，想無勞束帛，  
賁然來思，不待蒲輪，去彼空谷，希能屈已，佇望  
被雲。

徐則沒後下書



徐則詣揚州晉王請受道法辭以時日不  
便其後久中命侍者取香火如平常朝禮  
之儀至五更死支體柔弱如生停留數旬  
顏色不變王下書送還天台定葬時在道  
多見則徒步云得放還比至舊居取經書  
道法分遺弟子跨石梁去不知所之須臾  
柩至方知其靈化

天台真隱東海徐先生虛確居宗冲玄成德齊  
物處外檢行安身草褐蒲衣餐松餌朮棲隱靈  
岳五十餘年卓矣仙才飄然勝氣千尋萬頃莫  
測其涯寡人欽承道風久餐德素頻遣使乎遠  
此延屈冀得虔受上法式建良緣至止甫爾未

淹旬日、厭塵羽化、反真靈府、身體柔軟、顏色不變、經方所謂屍解地仙者哉、誠復師禮未申、而心許有在、雖忘怛化、猶愴于懷、喪事所資、隨須供給、霓裳羽蓋、旣且騰雲空、棹餘衣、詎藉墳壟、但杖舄猶存、示同俗法、宜遣使人送還天台、定葬



文

寶臺經藏願文

菩薩戒弟子楊廣和南仰惟如來應世聲教被  
物慇懃微密結集法藏帝釋輪王旣被付囑菩  
薩聲聞得揚大化度脫無量以迄于今至尊拯  
溺百王混一四海平陳之日道俗無虧而東南  
愚民餘燼相煽爰受廟略重清海濱役不勞師  
以時甯復深慮靈像尊經多同煨燼結髮繩墨  
湮滅溝渠是以遠命衆軍隨方收聚未及朞月

輕舟總至、乃命學司、依名次錄、并延道場、義府  
覃思、澄明所由、用意推比、多得本類。莊嚴脩葺、  
其舊惟新、寶臺四藏、將十萬軸、因發弘誓、永事  
流通、仍書願文、悉連卷後、頻屬朝覲、著功始畢、  
今止寶臺正藏、親躬受持、其次藏已下、則慧日  
法靈、道場日嚴、弘善靈刹、此外京都寺塔、諸方  
精舍、而梵宮互有小大、僧徒亦各衆寡、竝隨經  
部多少、斟酌分付、授者旣其懇至、受者亦宜殷  
重、長存法本、遠布達摩、必欲傳文、來入寺寫、勿



佛以慈兩失無作前佛後佛諒同金口卽教當  
教密殊玉牒須彌山上衆聖共持金剛海底天  
龍盡護散在閻浮亦復如是追念繕寫之者厥  
誠至隆心手勤到何量功德捨撤淨財豈可稱  
計所資甘雨用沃焦芽能生是佛本是般若人  
能弘法非道弘人恕已深恩卽是自爲今陳此  
意乃似執著若不開警則不深固自行化他備  
在經律顧循菲識誠媿通方因果相推何殊眼  
見豈不知獨善且最勝無爲第一樂內典法奧

自關衆僧、何事區區、橫相負荷、但慶憑宿植、生長王宮、謁陛趨庭、最存遠大、出受藩寄、每用祇兢、非惟禮樂政刑、一遵成旨、而舟航運出、彌奉弗墜、無容棄稷禹而同園綺、變菩薩而作聲聞。越用乖方、既其不可、篤信受付、竊敢當仁。然五種法師、俱得六根清淨、而如說脩行、涅槃最近、徒守經律、不依佛戒、口便說空心、滯於有無上醫王、隨病透藥、開乳含酥、爲方既異、甜冷苦熱、取療亦殊。譬前後教門、別赴機性、根莖枝葉、受



洞。終。齊。總。會。津。梁。無。不。入。道。猶。如。問。孝。問。仁。孔。  
酬。難。別。治。身。治。國。老。意。無。乖。殊。途。同。歸。一。致。百。  
慮。內。外。相。融。義。同。泯。合。何。處。有。學。毘。曇。而。不。成。  
聖。執。黎。耶。卽。能。悟。真。師。子。嚴。鎧。反。貼。毀。於。羸。目。  
象。足。至。底。翻。取。誚。於。蜂。房。心。同。劒。戟。諍。踰。水。火。  
經。意。論。意。都。不。如。斯。通。經。通。論。何。因。若。此。恐。施。  
甘。露。更。成。毒。藥。儻。均。味。海。則。致。醍。醐。聖。御。紺。寶。  
天。飛。金。輪。雲。動。納。萬。善。於。仁。壽。總。一。乘。於。普。會。  
開。發。含。識。濟。度。羣。生。今。所。傳。經。遍。于。宇。內。衆。聖。

潛力必運他方共登菩提早證常樂則是弟子  
之伸順弘誓於無窮平等坦然通遣唱白達識  
體之念隨喜也



秦孝王誄

維開皇二十年六月二十日丁丑上柱國秦孝  
王薨于仁壽宮，嗚呼哀哉！八元八凱，濟濟虞則；  
周南召南，赫赫周國。於穆孝王，紹彼明德。天實  
喪予，殲我剛克。嗚呼哀哉！如何上靈降此灾否。  
國喪宗臣，家亡千里。嗚呼哀哉！爰初不豫，冕旒  
視疾。及至大漸，停鑾駐驛。親臨屬纊，俯觀撤瑟。  
哀動皇情，痛深慈膝。一辭明世，千秋長慕。如何

綿綿終古，仲秋卜宅，將歸泉戶，梁山之陽，永甯  
后土，嗚呼哀哉，余寡兄弟，愛篤彌深，奄然零落，  
痛體傷心，嗚呼哀哉，追悼無及，永分古今，神雖  
虛翳，一作神靈雖翳徽聲靡替，誄王德音，貽千百世，乃

作誄曰

皇隋啓運，應天順民，保茲七百，靜彼四隣，利建  
宗子，藩屏懿親，孝王惟允，俾侯于秦，爰自聖章  
天性，誠愿色養，烝烝孝立，名建恭近於禮，恥辱  
斯遠，嘉之弗忘，懼而無怨，孝弟之至，通於神明



江江居德肅肅勵精恭敬表志退讓爲情韓此  
棠棣敦斯鵲鵲仲稱令弟叔曰仁兄猗歟我弟  
好學無替九流日脩三餘卒歲琴臺夜開書帷  
晝閉聰敏若神雄辯無滯妙矣聲律明哉龜筮  
玄象風角於焉及睿允文允武多才多藝惟善  
惟樂爲仁爲惠天挺出羣英圖命世欽若孝王  
容止堂堂振鷺將集鳳雛斯翔人之領袖國之  
輝光輝光伊何肅肅翼翼義以處身仁以經國  
明燭絜符財成淵塞靖恭爾位好是正直令聞

令望無反無側，皇枝良幹，日富英聲，宣風作伯。  
盤石維城，東京舊都，河南殷博，惟我哲王，行臺  
惟寔，飛轡嶠函，褰帳伊洛，德被汝墳，仁行鞏亳。  
西秦右地，實賴英雄，實惟王化，一作匪他乃卽龜蒙。

惠和布澤，易俗移風，亶亶孝王，仁而能斷，德敷  
大國，有符公旦，移鎮樊征，述職江漢，地接寇讎。  
稜威靖難，文德招遠，懷勞伐叛，蹙輟外藩，入侍  
天軒，典茲戎衛，仍居納言，實劒橫曜，豐貂尤溫。  
周衛清切，敷奏便繁，獻替惟允，禁旅斯敦，僞陳



不恭軼我炎鄙王赫斯振將清江涘圖斯元帥  
難全其備唯我孝王膺茲無愧恭行天討受脤  
建旗申威鄂渚鞠旅江湄軍容赳赳逋醜裍裍  
一作雲陳不布高城靡持泥首銜璧請命于台

纍纍

兵不血刃野無橫屍善戰不陣我弟于茲金陵  
戡定飲至京師廣陵淮海一都之會牧彼頑民  
作相于外時雨隨車棠陰逐蓋惟晉太原寄隆  
望大表裏山河要衝襟帶東自楊越迴旌轉旆  
善政廉平於斯爲最胡虜畏威氓黎荷賴烽火

戎馬俱清邊界，寒暑失御，庸衛弗開，言旋京邸。  
去彼叢臺，扈駕仁壽，撫席巖隈，連綿藥餌，歲去  
年來，秀而不實，禍極生災。天胡不弔，木壞山頽。  
嗚呼哀哉！至尊廢朝而悼傷，皇后輟膳而摧痛。  
甚秦國之永辭，劇梁武之長送。昆弟哀哀而日  
嗟，僚友嗷嗷而悲慟。嗚呼哀哉！歎日月之不居，  
何卜遠之詎促。旌旄飄飄而從風，笳管酸嘶而  
響谷。服馬顧而不能行，挽夫悲而不成曲。霜霰  
落兮山谷寒，木葉下兮邱壑殘。風颼颼而吟樹，



泉幽咽而悲湍。離羣之獸絕跡。孤飛之鳥悲酸。  
背離宮而東轉。厯山邱而北度。去甲第之樓臺。  
卽荒田之邱墓。昔時鳴鑾而戒途。今日靈輶而  
啓路。臨朝謁之平衢。永絕茲之一步。儻若神而  
有靈。幾悲傷而留顧。嗚呼哀哉。去永日之昭昭。  
襲長夜之悠悠。苦玄局而無曉。悲黃泉而永幽。  
湮盛年於萬古。徂壯志於千秋。嗚呼哀哉。慟反  
哭於秋季。悲復歸於故地。伊形遊而不遷。何魂  
旒之空志。嗚呼哀哉。酒罇浮塵兮獨滿。琴絃含

風兮自斷。冥夜久其何期。焉知歲月之長短。孝  
王與我體密情親。孔懷之篤。有踰常倫。昊天何  
酷。哀哉哲人。奈何吾弟。先我長淪。煩冤痛毒。悲  
恨何陳。嗚呼哀哉。痛母弟之同胞。棄共被之寒  
郊。豈止三荆之變色。非惟四鳥之分巢。遽一朝  
而云逝。曷何去而何止。形未捨目。言猶在耳。彼  
蒼者天子。何甚矣。嬛嬛一作慄慄友于。哀哀吾子。痛  
當奈何。痛當何已。想髣髴而不見。猶盤桓而佇  
立。空撫膺而莫追。抑飲淚而何及。嗚呼哀哉。嗟



地久而天長終淪彼乎幽方徒春華而秋落不  
復見我弟兮孝王何謝安之蔬食豈子路之喪  
亡獨端憂而誰告徒哽塞而迫傷悲莫悲兮長  
別痛莫痛兮終絕因悽愴以寫情慟人琴而永  
訣嗚呼哀哉





疏

受菩薩戒疏

使持節上柱國太尉揚州總管諸軍事揚州刺史  
晉王弟子楊廣稽首奉請十方三世諸佛本  
師釋迦如來當降此土補處彌勒一切尊經無  
量法寶初心以上金剛以降諸尊大權摩訶薩  
埵辟支緣覺獨脫明悟二十七賢聖他心道眼  
乃至三有最頂十八梵王六欲天子帝釋天主  
四天大王天仙龍神蜚騰隱顯任持世界作大

利益守塔衛法防身護命護淨戒無量善神咸  
願一念之頃承佛神力俱會道場證明弟子誓  
願攝受弟子功德竊以識暗萌興卽如來性無  
明俯墜本有未彰理數斯歸物極則反欲顯當  
果必積于因是調御世雄備厯生死草木爲籌  
不可勝計恒沙集起固難思議深染塵勞方能  
厭離法王啓運本化菩薩譬如日出先照高山  
隨逗根宜權爲方便如彼衆流咸宗大海弟子  
基承積善生在皇家庭訓早趨貽教夙漸福理



攸鍾妙機須悟恥崎嶇於小逕希優游於大乘  
笑止息於化城誓舟航於彼岸但開士萬行戒  
善爲先菩薩十受專持最上喻造宮室必因基  
址徒架虛空終不成立弗揆庸懷抑又聞之孔  
老釋門咸資鎔鑄不有軌儀吾將安仰誠復釋  
迦能仁本爲和尚文殊師利冥作闍黎而必藉  
人師顯傳聖授自近之遠感而遂通薩陀波崙  
罄髓於無竭善財童子忘身於法界經有明文  
敢爲臆說深信佛語聿遵明導天台智顗禪師

佛法龍象童真出家戒珠圓淨年將耳順定水  
淵澄因靜發慧安無礙辨先物後已謙挹盛風  
名稱普聞衆所知識弟子所以虔誠遙注命楫  
遠延每畏緣差值諸留難亦既至止心路豁然  
及披雲霧卽銷煩惱謹以今開皇十一年十一  
月二十三日總管金城設千僧蔬飯敬屈禪師  
受菩薩戒戒名爲孝亦名制止方便智度歸親  
奉極以此勝福奉資至尊皇后作大莊嚴同如  
來慈普諸佛愛等視四生猶如一子弟子卽日



無量瞻業。生生世世。還生佛家。如日月燈。明之  
八王子。如大通智勝十六沙彌眷屬。因緣法成。  
等侶俱出。有流到無。爲地平均。六度恬和。四等  
衆生。無盡度脫。不窮。結僧那於始心。終大悲以  
赴難。博遠如法界。究竟若虛空。具足成就。皆滿  
願海。楊廣和南

天台建功德發願疏

菩薩戒弟子總持和南十方三世諸佛一切尊  
法三乘聖衆上界天僊龍神他心道眼護持應

硯罌塞虛空無量幽顯切聞諸佛菩薩不捨本  
誓爲天人師拔濟含識次令和南闍黎代作宗  
範引接後來與佛無異資敬之重具在經律不  
有明導豈濟苦海匪報厚德豈收福田遺行可  
追謹依佛語菩薩戒先師天台智者來踰剡嶺  
遷化石城初聞訊至哀情摧飮敬惟勝行逾滿  
熙連佛許臨終自說所得今聞侍者所書巨有  
異相稱吾位居五品弟子事在法華十佳信心  
文具瓔珞於是空聲異響徧滿山房索披大衣



云觀音來至，驗知入決定聚，面覩彌陀靜攝，遷  
神安坐，身證久移晦朔，容相儼然，斯蓋無量劫  
來檀慧具足，深護佛法，發起羣生，非無顯晦出  
沒，其孰能於此歟？有始有終者，其惟聖人乎？設  
以辯才千萬，偈讚師福慧，終不能盡。夏初遣信  
到山，期法歲竟，迎接僧臘既滿，尚疑谿谷毒厲，  
意取氣交霜雪，杯度鏡水，及屆剡下，便承卧疴，  
豈言信次，騰神淨域，遂不獲重音容，再諮法味，  
維摩義疏，蘊而莫宣，良由宿障根深，致違心契。

已悔於前、須補於後、近於此州禪衆舊居、雖仰  
爲設會、并就天台指畫之地、則造寺塔、而於彼  
山頭陀之處、未護重修、今寅覽別書、囑寄佛法、  
不思議事、感歎銘衿、無已之誠、今遣往於佛隴  
峰頂、集衆結齋、願承三寶之力、速達西方、智者  
證知淨土、記蒞生生世世、長爲大師弟子、未得  
佛前、早相度脫、不棄緣感、弘到菩提、并乞衆力  
爲弟子懺悔、自從無明住地以來、至于今日、恒  
沙惑障、煩惱迷昏、五蓋十纏、輪迴界內、八萬四



千座勞增長。願憑積慶及茲功德。衆罪霜露。慧  
日消除。衆善普會。法雨洋溢。神通道九。照藹皇  
家。寶祚靈長。覃被億兆。開皇十八年正月二十九日

敬靈龕疏

維隋仁壽元年歲次辛酉十二月十七日庚寅  
菩薩戒弟子皇太子總持和南敬告天台山寺  
先師智者全身舍利靈龕之座。粵竊聞民生在  
三事之如一。皆資聖範。能遂賢功。顏回不值宣  
尼。豈隣殆庶。尹喜不逢老氏。安致長齡。況乎乘

般若之舟，望菩提之岸，弗有明導，豈至寶所復  
因信俱，次法城，所謂自利利他人。我兼利師，及  
弟子智斷具足，抑又聞曰：疎傳告老，太子贈以  
黃金，桓師退辭，家庭陳於喪服，斯並有爲方內。  
少用報恩，豈臻無際空表，盡酬師力。弟子宿植  
德本，早承道教，身戒心慧，蒙瑩明珠，早穗寒莢，  
盡沾甘露，雖復時流歲永，生滅不追，行住坐臥，  
伏膺如在，爰以景昧，謬齒元良，守器非才，昇離  
多懼，復奉明詔，曩經作伯，暫輟監撫，還省宸方。



瞻望天台，有如地踊。僧使續來，龕瑞重疊，多寶  
妙塔，如意分身，玉毫金光，分背破暗，應念彈指，  
自室空聲，有一於此，已稱靈顯。四者難并，豈非  
希有。自曇光坐滅之後，道猷身證以來，興公飛  
錫，所不能稱。靈運山居，未有斯事。盛矣哉！是我  
大師證道之基趾也。至矣哉！是我良田之報歲  
也。詩云：無言不酬，無德不報。經稱：知恩報恩。諸  
佛皆爾。近歲雖遵誠約，脩構祇桓，多慚布金，止  
因山宇，庶同心淨域，勝土莊嚴，幸僧衆無虧，熏

脩不缺。冥力深扶。人功多愧。今遣員外散騎侍郎兼通事舍人張乾威送僧使灌頂等還山。於寺設會。稽首接足。十方三世一切三寶。無量幽顯。現前大衆。以此功德。仰資先師智者。早證正覺。具如臨終證現。以生安養。頃來留瑞。久現彌陀。踵武觀音。連衡大勢。回眸東視。不捨娑婆。轉睇南閤。彌憐震旦。滄溟巨海。尚不讓於涓流。嵩華峻極。安荀排於微壝。敢陳薄供。願垂攝受。當使無邊法身。盡承甘露。無量化影。咸進醍醐。涅



盤餐之不可窮般若味之不可竭盡我念力遵  
我師道消我煩惱滿我誓願現在未來長慧提  
拔家國眷屬俱入大乘密往潛來恒垂影響塵  
勞障累消除隱塞究竟等虛空圓滿如法界斯  
則大師勝力諸佛荷擔弟子含慈出如來藏無  
離文字以求解脫文字之性卽解脫也不着世  
間如蓮華常善入於空寂行達諸法相無罣礙  
稽首如空不可依

設齋願疏

菩薩戒弟子皇太子總持和南十方三世法佛  
報佛應佛法身應身化身諸佛所師所謂法也  
以法常故諸佛亦常佛常法常比丘僧常世間  
皆空而實不空諸佛妙有而實不有不有而有  
不空而空至寂恬然始名至樂凡情弊報皆生  
極苦迷之者則生盲皓首得之者則罔象玄珠  
弟子幸憑勝緣微因宿種方便智度生在佛家  
至尊皇后慈仁胎教有八王子日月燈明之恩  
十六沙彌大通智勝之勗加以昔蒞淮海欽尚



釋門先師天台智者顓禪師。膺請江都。授菩薩  
戒。由是開悟。歸憑有在。而夢楹託諷。梁木先顏。  
合掌安禪。端坐示滅。于今數載。儼然若思。適現  
儀形。續放光燄。彈指之聲。震于龕室。僧使報述。  
遐邇聳踊。皆由佛法僧力。感應相關。汲引含靈。  
故現斯瑞。肅奉明詔。暫輟監國。巡慰淮揚。銜顓  
毗黎。思報佛恩。少酬師道。以今大隋仁壽元年  
歲次辛酉十二月十七日。謹遣員外散騎侍郎  
通事舍人張乾威。到天台山寺。敬設蔬飯。雖調

八水多漸百味。庶同純陀之末供。有如淨名之遙請。色香細軟。徧滿十方。歡喜甘餐。甯唯百億天僊龍神。竝希雲布。任持世界。盡望星羅。以智者之分身。納師資之攝受。經稱信爲能入。智爲能度。願消甘露。咸濟苦海。應變穢土。通同淨國。天覆地載。長轉金輪。七廟六宗。永安玉座。本支百世。紹隆萬紀。男女緇素。皆染大乘。水陸空行。咸知佛性。須彌入於芥子。未足成難。食頃猶如巨劫。曷以爲怪。井蛙不識江海。蚊睫安知鵬翼。



以我今懺竝乞氷消以我今誠皆入願海發菩提心徧在諸物菩提心者卽是佛心下度衆生上求佛果不可以身得不可以心得以無所得卽菩提心無所得卽是得無所得稽首歸命十方三寶





樂府

飲馬長城窟行示從征羣臣

以下  
五言

蕭蕭秋風起，悠悠行萬里。  
萬里何所行，橫漠築  
長城。豈台小子智，先聖之所營。  
樹茲萬世策，安此億兆生。  
詎敢憚焦思，高枕於上京。  
兩河秉武節，千里捲戎旌。  
山川互出沒，原野窮超忽。  
縱金止行陣，鳴鼓興士卒。  
千乘萬騎動，飲馬長城窟。  
秋昏塞外雲，霧暗關山月。  
緣巖驛馬上，乘空烟  
火發。借問長城候，單于入朝謁。  
濁氣靜天山，晨

光照高闕，釋兵仍振旅。要荒事方舉，飲至告言旋。功歸清廟前。

白馬篇

文苑英華作煬帝樂府作孔稚圭案詩中多叙征遼之事當以英華爲正稚圭別有篇二

白馬金貝裝，橫行遼水傍。問是誰家子，宿衛羽林郎。文犀六屬鎧，寶劍七星光。山虛弓響徹，地迴角聲長。宛河推勇氣，隴蜀擅威強。輸臺受降虜，高闕剪名王。射熊入飛觀，校獵下長楊。英名



拔衛霍智策茂平良，島夷時失禮，卉服犯邊疆。  
徵兵集薊北，輕騎出漁陽。進軍隨日暈，挑戰逐  
星芒。陣移龍勢動，營開虎翼張。衝冠入死地，攘  
臂越金湯。塵飛戰鼓急，風交征旆揚。轉鬪平華  
地，追奔掃鬼方。本持身許國，况復武功彰。會令  
千載後，流譽滿旂常。

步虛詞二首

洞府凝玄液，靈山體自然。俯臨滄海島，回出大  
羅天。八行分寶樹，十丈散芳蓮。懸居燭日月，天

步役風烟躡記書金簡、乘空誦玉篇、冠法二儀  
立珮帶五星連、瓊軒觴甘露、瑜井挹膏泉、南巢  
息雲馬、東海戲桑田、回旗遊八極、飛輪入九玄、  
高蹈虛無外、天地乃齊年、

總轡行無極、相推凌太虛、翠霞承鳳輦、碧霧翼  
龍輿、輕舉金臺上、高會玉林墟、朝遊度圓海、夕  
宴下方諸、

春江花月夜二首

晉書樂志曰春江花月夜、玉樹後庭花、并  
陳後主所作、後主常與宮中女學士及朝



臣相和爲詩太常令何胥又善  
文詠採其尤艷麗者以爲此曲

暮江平不動春花滿正開  
流波將月去潮水帶

玉臺作共星來

夜露含花氣春潭漾月暉  
漢水逢遊女湘川值  
兩妃

錦石擣流黃二首

漢使出燕然愁閨夜不眠  
易製殘燈下鳴砧秋  
月前

今夜長城下雲昏月應暗  
誰見倡樓前心悲不

成慘

喜春遊歌二首

禁苑百花新，佳期遊上春。  
輕身趙皇后，歌曲李夫人。

步緩知無力，臉曼動餘嬌。  
錦袖淮南舞，寶袂楚宮腰。

江都宮樂歌

以下  
七言

揚州舊處可淹留，臺榭高明復好遊。  
風亭芳樹迎早夏，長臯麥隴送餘秋。  
淥潭桂楫浮青雀，果



下金鞍躍紫騮，綠觴素蟻流霞飲。  
長袖清歌樂戲州。

泛龍舟

唐書樂志曰泛龍舟  
隋煬帝江都宮作

舳艫千里泛歸舟，言旋舊鎮下揚州。  
借問揚州在何處，淮南江北海西頭。  
六轡聊停御百丈，暫罷開山歌棹謳。  
詎似江東掌間地，獨自稱言鑑裏遊。

四時白紵歌二首

東宮春

洛陽城邊朝日暉，天淵池前春燕歸。  
含露桃花開未飛，臨風楊柳自依依。  
小苑花紅洛水綠，清歌宛轉繁絃促。  
長袖逶迤動珠玉，千年萬歲陽春曲。

江都夏

黃梅雨細麥秋輕，楓樹蕭蕭江水平。  
飛樓綺觀軒若驚，花簾羅幃當夜清。  
菱潭落日雙鳬綠，水紅妝兩搖漾。  
還似扶桑碧海上，誰一作詎肯空。



歌採蓮唱

紀遼東二首

襍言

隋書曰大業八年煬帝伐高麗度遼水大戰於東岸擊賊破之進圍遼東

遼東海北剪長鯨風雲萬里清  
方當銷鋒散馬牛旋師宴鎬京  
前歌後舞振軍威飲至解戎衣  
判不徒行萬里去空道五原歸

秉旄仗節定遼東俘馘變夷風  
清歌凱捷九都水歸宴雒陽宮  
策功行賞不淹留全軍藉智謀  
詎似南宮復道上先封雍齒侯





詩

冬至乾陽殿受朝

北陸玄冬盛，南至晷漏長。  
端拱朝萬國，守文繼百王。  
至德慙日用，治道愧時康。  
新邑建嵩岳，雙闕臨洛陽。  
圭景正八表，道路均四方。  
碧空霜華淨，朱庭皎日光。  
纓珮既濟濟，鐘鼓何鏗鏘。  
文戟翊高殿，采眊分脩廊。  
元首乏明哲，股肱貴惟良。  
舟楫行有寄，庶此王化昌。

雲中受突厥主朝宴席賦

鹿塞鴻旗駐，龍庭翠輦回。璫帷望風舉，窮廬向日開。呼韓頓顙至，屠耆接踵來。索辦擎羶肉，韋韞獻酒杯。如何漢天子，空上單于臺。

宴東堂

雨罷春光潤，日落暝霞暉。海榴舒欲盡，山櫻開未飛。清音出歌扇，浮香飄

一作

舞衣。翠帳全臨戶，金屏半隱扉。風花意無極，芳樹曉禽歸。

賜史祥

北史曰：煬帝卽位，漢王作亂，遣其將綦毋良自滏口徇黎陽，塞白馬津。余公理自太



行下河內帝以祥爲行軍總管軍于河陰  
公理屯兵河陽城內以備祥祥簡精銳于  
下流潛度擊公理大破之東趣黎陽綦母  
良棄軍走其衆大潰進位上大將軍轉太

僕卿帝

賜祥詩

伯熒朝繼重夏侯親遇深貴耳唯聞古賤目詎  
知今早慟勁草質久有背淮心掃逆黎山外振  
旅河之陰功已書王府留情太僕箴

賜牛弘

北史曰煬帝在東宮數有詩書遺弘弘亦有答及嗣位賜弘詩云云其同被賜詩者至于文辭贊揚無如弘美

晉家山吏部、魏代盧尚書、莫言先哲異、奇才並  
佐予、學行敦時俗、道素乃冲虛、納言雲閣上、禮  
儀皇運初、彝倫欣有序、垂拱事端居、

賜諸葛穎

隋書本傳曰、煬帝卽位、遷穎著作郎、  
甚見親待、帝嘗賜穎詩、其卒章曰、

叅翰長洲苑、侍講肅成門、名理窮研覈、英華恣  
討論、實錄資平允、傳芳導後昆、

早渡淮

平淮旣淼淼、曉霧復霏霏、淮甸未分色、泱泱共



晨晴霞轉孤嶼錦帆出長圻潮魚時躍浪沙  
禽鳴欲飛會待高秋晚愁因逝水歸

臨渭源

西征乃屆此山路亦悠悠地幹紀靈異同穴吐  
洪流濫觴何足擬浮槎難可儔驚波鳴澗石澄  
岸瀉巖樓滔滔下狄縣淼淼肆神州長林嘯白  
獸雲徑想青牛風歸花葉散日舉烟霧收直爲  
求人隱非窮轍迹遊

還京師

東都禮儀舉。西京冠蓋歸。是月春之季。花柳相依依。雲蹕清馳道。雕輦御晨暉。嘹亮鐃笳奏。葳蕤旌旆飛。後乘趨文雅。前驅厲武威。

捨舟登陸示慧日道場玉清玄壇德衆

天淨宿雲卷。日舉長川旦。颺灑林花落。逶迤風散柳。孤鶴近追羣。啼鶯遠相喚。蓮舟水處盡。畫輪途始半。江漣各自遙。東西並興歎。已熏禪慧力。復藉金丹捍。有異三川遊。曾非四門觀。於焉履妙道。超然登彼岸。



謁方山靈巖寺

梵宮旣隱隱，靈岫亦沈沈。平郊送晚日，高峯落  
遠陰。廻旛飛曙嶺，疎鐘響晝林。蟬鳴秋氣近，泉  
吐石溪深。抗迹禪枝地，發念菩提心。

月夜觀星

團團素月淨，條條夕景清。谷泉驚暗石，松風動  
夜聲。披衣出荆戶，躡履步山楹。欣覩明堂亮，喜  
見泰階平。觜參猶可識，牛女尚分明。更移斗柄  
轉，夜久天河橫。徘徊不能寐，參差幾種情。

季秋觀海

孟軻敘遊聖、枚乘說瘡疾、逃聽乃前聞、臨深驗  
茲日、浮天迴無岸、含靈固非一、委輸百谷歸、朝  
宗萬川溢、分城一作空碧霧晴、連洲彩雲密、欣同  
夫子觀深愧、玄虛筆

望海

碧海雖欣矚、金臺空有聞、遠水翻如岸、遙山倒  
似雲、斷濤還共合、連浪或時分、馴鷗舊可狎、卉  
木足爲羣、方知小姑射、誰復語臨汾



詠鷹

遷朔欲之衡，忽投尉羅裏。旣以羈華絆，仍持獻  
君子。青骹固絕儔，素羽誠難擬。深目表茲稱，闊  
臆斯爲美。驚獸不及奔，猜禽無暇起。雖蒙鞬上  
榮，無復凌雲志。

獻歲讌宮臣

三元建上京，六佾宴吳城。朱庭容衛肅，青天春  
氣明。朝光動劒絲，長階分珮聲。酒闌鐘磬息，欣  
觀禮樂成。

正月十五日于通衢建燈夜升南樓

法輪天上轉，梵語天上來。  
燈樹千光照，花燄七枝開。  
月影疑流水，春風含夜梅。  
旛動黃金地，鐘發琉璃臺。

晚春

洛陽春稍晚，四望滿春暉。  
楊葉行將暗，桃花落未稀。  
窺簷燕爭入，穿林鳥亂飛。  
唯當關塞者，潯露方霑衣。

悲秋



去年秋始去，今年秋復來。露濃山氣冷，風急蟬聲哀。鳥擊初移樹，魚寒欲隱苔。斷霧時通日，殘雪尚作雷。

冬夜

不覺歲將盡，已復入長安。月影含冰凍，風聲淒夜寒。江海波濤壯，嶠潼坂險難。無由寄飛翼，徒欲動和鑾。

夏日臨江

夏潭蔭脩竹，高岸坐長楓。日落滄江靜，雲散遠

山空鷺飛林外白，蓮開水上紅。  
逍遙有餘興，悵望情不終。

北鄉古松樹

古松惟一樹，森竦詎成林。  
獨留塵尾影，猶橫偃蓋陰。  
雲來聚雲色，風度雜風音。  
孤生小庭裏，尚表歲寒心。

賜守宮女

隋遺錄曰：帝將幸江都，東都宮女半不隨。  
駕泣留帝言：遼東小國，不足煩大駕，願擇將征之。帝意不回，因戲飛帛題二十字，賜守宮女。



我夢江都好。征遼亦偶然。但存顏色在離別。只

今拾遺作經年。

### 持檝篇賜吳絳仙

帝幸江都。至汴。帝御龍舟。蕭妃乘鳳舸。每舟擇妙麗女子千人。執雕板。鏤金檝。號殿脚女。中吳絳仙者。柔麗不與羣輩齒。因有寵於帝。帝每倚簾視絳仙。移時不去。因吟持檝篇賜之。

舊曲歌桃葉。新妝艷落梅。將身倚輕檝。知是渡江來。

### 贈張麗華

帝昏酒，往往爲妖祟，所惑嘗遊吳公宅，雞臺與陳後主相遇，後主侍女數十許，中人迥美，帝屢目之，後主云：「此卽麗華也。」帝與後主復詩十數篇，麗華求帝一章，帝操觚，麗華捧侍，赧然不懌。

見面無多事，聞名爾許時，坐來生百媚，實個好

相知。

此或偽筆

### 憶韓俊娥二首

帝在廣陵，侍兒韓俊娥尤得帝意，蕭妃誣罪去之，帝不能止，暇日登迷樓憶之，題東南二

牋。

黯黯愁侵骨，綿綿病欲成，須知潘岳鬢，強半爲



不信長相憶，絲從鬢裏生。間來倚樓立，相望幾  
含情。

### 幸江都作

隋書五行志曰，煬帝自京師如東都，至長樂宮，飲酒大醉，因賦五言詩，其卒章曰，徒有歸飛心，無復因風力，令美人再三吟咏，帝泣下霑襟，侍御者莫不欲歔，帝因幸江都，復作五言詩云，帝以三月被弑，卽遭春之應也，是年盜賊蜂起，道路隔絕，帝遂無還心，復夢二豎子歌曰，去亦死，住亦死，未若乘船渡江水，由是築宮丹陽，將居焉，功未就而被弑。

求歸不得去，真成遭個春。  
鳥聲爭勸酒，梅花笑殺人。

嘲羅羅

以下  
七言

帝常醉遊諸宮，偶戲宮婢羅羅者。  
羅羅畏蕭妃，不敢迎帝，帝嘲之。

個人無賴是橫波，黛染隆顙簇小蛾。  
幸好留儂伴，成夢不留儂，任意如何。

鳳艣歌

廣五行志曰：隋煬帝三月三日，  
江上作鳳艣歌，乃唐興之兆。

三月三日向江頭，正見鯉魚波上游。  
意欲垂釣



行將取恐是蛟龍還復休

### 述樓歌

帝再幸江都。有述樓。宮人夜歌。帝披衣起聽。召問之。云孰使汝歌也。女自爲之。邪。宮女曰。臣有弟在民間。曰道途兒童。多唱此。帝默然。久之曰。天啓之也。因索酒自歌。

宮木陰濃燕子飛。興衰自古漫成悲。他日述樓更好景。宮中吐艷變紅輝。

### 效劉孝綽憶詩二首

以下雜言

憶睡時。待來剛不來。卸妝仍索伴。解珮更相催。  
博山思結夢。沈水未成灰。

憶起時投籤初報曉。被慙香黛殘。枕隱金釵裊。  
笑動上林中。除却司晨鳥。



本紀

煬皇帝諱廣一名英小字阿麼高祖第二子也  
母曰文獻獨孤皇后上美姿儀少敏慧高祖及  
后於諸子中特所鍾愛在周以高祖勲封鴈門  
郡公開皇元年立爲晉王拜柱國并州總管時  
年十三尋授武衛大將軍進位上柱國河北道  
行臺尚書令大將軍如故高祖令項城公歆安  
道公才李徹輔導之上好學善屬文沈深嚴重  
朝野屬望高祖密令善相者來和徧視諸子和

曰、晉王眉上雙骨隆起貴不可言、旣而高祖幸  
上所居第、見樂器絃多斷絕、又有塵埃、若不用  
者、以爲不好、聲妓善之、上尤自矯飾、當時稱爲  
仁孝、嘗觀獵、遇雨、左右進油衣、上曰、士卒皆霑  
濕、我獨衣此乎、乃令持去、六年、轉淮南道行臺  
尚書令、其年徵拜雍州牧、內史令、八月、冬、大舉  
伐陳、以上爲行軍元帥、及陳平、執陳湘州刺史  
施文慶、散騎常侍沈客卿、市令陽慧朗、刑法監  
徐析、尚書都令史暨慧、以其邪佞有害於民、所



之右闕下。以謝三吳。於是封府庫資財無所取。天下稱賢。進位太尉。賜輅車乘馬。袞冕之服。立珪白璧各一。復拜并州總管。俄而江南高智慧等相聚作亂。徙上爲揚州總管。鎮江都。每歲一朝。高祖之祠太山也。領武侯大將軍。明年歸藩。後數載。突厥寇邊。復爲行軍元帥。出靈武。無虜而還。及太子勇廢。立上爲皇太子。是月當受冊。高祖曰。吾以大興公成帝業。今上出舍。大興縣其夜烈風大雪。地震山崩。民舍多壞。壓死者百

餘口、仁壽初奉詔巡撫東南、是後高祖每避暑  
仁壽宮、恒令上監國、四年七月高祖崩、上卽皇  
帝、位於仁壽宮、

初上自以藩王次不當立、每矯情飾行、以釣虛  
名、陰有奪宗之計、時高祖雅信文獻皇后、而性  
忌妾媵、太子勇內多嬖幸、以此失愛、帝後庭有  
子、皆不育之、示無私寵、取媚於后、大臣用事者、  
傾心與交、中使至第、無貴賤、皆曲承顏色、申以  
厚禮、婢僕往來者、無不稱其仁孝、又常私入宮



高祖大漸暨諒闇之中、烝淫無度、山陵始就、卽  
事巡遊、以天下承平日久、士馬全盛、慨然慕秦  
皇漢武之事、乃盛治宮室、窮極侈靡、召募行人、  
分使絕域、諸蕃至者、厚加禮賜、有不恭命、以兵  
擊之、盛興屯田於玉門柳城之外、課天下富戶  
益市武馬、匹直十餘萬、富疆坐是凍餒者十家  
而九、帝性多詭譎、所幸之處、不欲人知、每之一  
所、輒數道置頓、四海珍羞殊味、水陸必備焉、求

市者無遠不至郡縣官人競爲獻食豐肉者進  
推疎儉者獲罪茲吏侵漁內外虛竭頭會箕歛  
人不聊生于時軍國多務日不暇給帝方驕怠  
惡聞政事冤屈不治奏請罕決又猜忌臣下無  
所專任朝臣有不合意者必構其罪而族滅之  
故高頴賀若弼先皇心膺參謀帷幄張衡李金  
才藩邸惟舊績著經綸或惡其直道或奮其正  
議求其無形之罪加以刎頸之誅其餘事君盡  
禮蹇蹇匪躬無辜無罪橫受夷戮者不可勝紀



政刑弛紊，賄貨公行，莫敢正言，道路以目。六軍  
不息，百役繁興，行者不歸，居者失業，人饑相食，  
邑落爲墟，上不之恤也。東西遊幸，靡有定居，每  
以供費不給，逆收數年之賦，所至唯與后宮流  
連沈湎，惟日不足，招迎嫖媼，朝夕共肆醜言，又  
引少年，令與宮人穢亂，不軌不遜，以爲娛樂。區  
宇之內，盜賊蜂起，劫掠從官，屠陷城邑，近臣互  
相掩蔽，隱賊數不以實對，或有言賊多者，輒大  
被詰責，各求苟免，上下相蒙，每出師，徒敗亡相

繼戰士盡力必不加賞百姓無辜咸受屠戮黎庶憤怨天下土崩至於就擒而猶未之寤也

史臣曰煬帝爰在弱齡早有令聞南平吳會北却匈奴昆弟之中獨著聲績於是矯情飾貌肆厥姦回故得獻后鍾心文皇革慮天方肇亂遂登儲兩踐岐極之崇基承丕顯之休命地廣三代威振八紘單于頓顙越裳重譯赤仄之泉流溢于都內紅腐之粟委積於塞下負其富強之資思逞無厭之欲狹殷周之制度尚秦漢之規



英特才矜已、傲狠明德、內懷險躁、外示凝簡、盛  
冠服以飾其姦、除諫官以掩其過、淫荒無度、法  
令滋章、教絕四維、刑參五虐、鋤誅骨肉、屠勦忠  
良、受賞者莫見其功、爲戮者不知其罪、矯怒之  
兵、屢動土木之功、不息頻出、朔方三駕、遼左旌  
旗、萬里徵稅百端、猾吏侵漁、人不堪命、乃急令  
暴條以擾之、嚴刑峻法以臨之、甲兵威武以董  
之、自是海內騷然、無聊生矣、俄而玄感肇黎、陽  
之亂、匈奴有鴈門之圍、天子方棄中土、遠之揚

越姦宄乘釁，強弱相陵，關梁閉而不通，皇輿往而不反，加之以師旅，因之以饑饉，流離道路，轉死溝壑，十八九焉。於是相聚萑蒲，蝟毛而起，大則跨州連郡，稱帝稱王，小則千百爲羣，攻城剽邑，流血成川，澤死人如亂麻，炊者不及析骸，食者不遑易子，茫茫九土，並爲麋鹿之場，悖悖黔黎，俱充蛇豕之餌。四方萬里，簡書相續，猶謂鼠竊狗盜，不足爲虞。上下相蒙，莫肯念亂，振蜉蝣之羽，窮長夜之樂，土崩魚爛，貫盈惡稔，普天之



下莫匪仇讐、左右之人皆爲敵國、終然不悟同  
彼望夷、遂以萬乘之尊、死於一夫之手、億兆靡  
感恩之士、九牧無勤王之師、子弟同就誅夷、骸  
骨棄而莫掩、社稷顛隕、本枝殄絕、自肇有書契、  
以迄于茲、宇宙崩離、生靈塗炭、喪身滅國、未有  
若斯之甚也、書曰、天作孽猶可違、自作孽不可  
逭、傳曰、吉凶由人、祇不妄作、又曰、兵猶火也、不  
戢將自焚、觀隋室之存亡、斯言信而有徵矣、

隋煬帝集卷全終



三







